



擇石齋

文集

擇石齋文集總目

第一卷

翰林院恭撰文

第二卷

奏摺

第三卷

奏摺

第四卷

策問

第五卷

序

第六卷

序二

第七卷

序三

第八卷

序四

第九卷

序五

第十卷

記一

第十一卷

記二

第十二卷

傳

第十三卷

跋一

第十四卷

跋二

第十五卷

跋三

第十六卷

贊

第十七卷

銘

第十八卷

賦

第十九卷

約

墓疏

告示

呈

第二十卷

碑

第二十一卷

墓誌銘一

第二十二卷

墓誌銘二

第二十三卷

墓誌銘三

第二十四卷

墓表

第二十五卷

祭文

第二十六卷

萬松居士詞

稗石齋文集卷第一

翰林院恭撰文
獻俘告祭

秀水 錢載 坤一

社稷壇文

維

天維

祖

宗集命予一人綏和萬邦宜德之文輯甯萬邦宜德之武自夫伊犁大定暨于回部悉臣乃有逆曾小和卓木霍集占兄弟者負我深恩肆為狂悖爰申天討用協人心茲將軍兆惠富德等疊報捷音克平二逆其

地則拔達山界其汗則素爾坦沙旣奉檄以歸誠遂殲渠而
酋首竝將擒獲馳送京師大軍奏凱而還古禮獻功于社迺
臻西極咸徠之盛皆賴

靈祇默佑之鴻典舉獻俘伏惟

神鑒謹告

上躬謁

泰陵祝文

仰惟

皇考德懋建中功勤馭外

神謨廣運鞏奕世之丕基

至教長詒啟無疆之駿業頻歲渾夷底定昨冬回部悉平乃

敢告

廟致虔復卽上

陵申謝皆賴兢兢業業操十三年之心敬承

皇祖用令蕩蕩平平廓二萬里之域孚格

天庥實荷

先恩彌懷永慕謹于夙夜當有道以持盈篤我邦家惟在天

之裕後伏祈

慈鑒尙

賜居歆

純惠皇貴妃百日祭文

繭館桑壇彌軫協坤之度蕙肴蘭藉疊攄申巽之忱俟彤史
以傳芳臨玉除而致誅爾純惠皇貴妃秉心四德贊教六宮
早毓慶之叶占本支裕啟久宣勤之如禮內職宏修詎上界

今翱翔緬流塵兮俄頃蜩鳴螢照苑露白以霏霏黍熟禾登
園風涼而冉冉已過中元之節適逢合朔之辰百日旋周一
卮永悼嗚呼惟純惟惠昭淑範于方來以典以文篤恩施于
未既欽茲芬苾尙克歆承

皇三子大祭文

金枝露擢方圖德緒之昌玉樹風零奚忍哀辭之罄一句已
越大祭斯陳爾皇三子永性而克孝學則多文勤講習于
書房早得羣經淹貫飭威儀于子舍洵爲諸弟觀型每呈覽
夫篇章輒願言其成就念失亾妃之恃甫銜今夏之悲定默
損于五中至情莫慰遂亟攫乎二豎弱質難支既藥鼎以無
方豈雲駟而有路孟蘭會上猶餘一夕之香華鶴歸來乍隔
千秋之訊思而不見慟矣如何嗚呼眷茲椒寢逝百日而未

過敕爾醴筵涕兩行而已極載申些告尙格歆承

祭敕建河神廟告成加封文

維神源尊星宿潤達滄溟夙襄土宇之安鴻播民人之利
仰溯祖功

宗德奠大川以升馨用符秋報春祈推隆禮而受福靈祇
既妥奕禩同瞻

朕撫寓是勤賓河彌恪念茲鴈戶農稼者數十州鞏我金隄
歲修者億萬帑爰以孫家之集溢于丙子之秋敦敕臣工亟
完築塞春風載展巡綠野于江壖夏月親臨視黃流于徐境
齋心虔格順軌慶臻荷

神明默相之勞捷于呼吸欣大溜遄歸之暢滌彼闕淤實感

宏庥用申祇咎命官立廟卽地鳩材規山勢于雲龍雄開方
位轄水維于淮泗靜鎮疆原越稔歲而落成撰良辰以致告
既新專祀特進崇稱謹加封神爲顯佑通濟昭靈效順廣
利安民金龍四大王粹穆輝容炳麟祝號增于前典巍彰庇
物之仁垂有後徽普協祐邦之吉從此翠旂肅指分左廡右
廡以揚蕤經瀆恬趨合上游下游而秉令淵涵九曲桃花瓜
蔓常清澤沃萬年休氣榮光益茂
朕方基于宥密孚

天心以式羣靈神其懋乃保障濟地道而康庶彙潔將牲
醴緩享初儀永鑒誠禋翊和盛化

祭敕建海神廟告成文

滄海爲九川之長浙河受三折之趨潤注惟功基防是力當

先帝懷柔之治孚以馨香維明神感格之心恬茲潮汐旣
敕祀鹽官之邑遂鞏成玉帶之隄沃壤敷滋豐年賴慶
朕再臨吳越兩報牲牢爰規勢於錢塘雄開離位特庀材于
將作敬妥坎靈永冀嘉庥載崇新構陽侯率職森羅衛從之
儀水伯承風申布指揮之義門外東瞻萬里朗雲靄于楮龕
樓前西轉一江肅濤瀾于子午翠旂初展全收鯤壑清光蘭
橈高騫靜擁鳳山正色從此惠予稼穡奠我人民地近鐵幢
簫鼓奏送迎之曲天臨貝闕春秋虔香火之司茲以落成撰
辰專告靈其昭貺實用鑒歆

祭錢塘江神文

維神浙汜疏靈海邦播潤朝朝夕汐噓喻稟夫陰陽秋旺
春生往來符于晦朔是以山開吳越一江之形勢占雄州合

東西千里之人文匯秀既歲時而典秩胥民物以綏嘉
朕玉輅初巡曾臨鳳艦青旂載拂更錫龍章攬瀘藻以薦芬
專官肅告答濤瀾之循軌沃壤豐登 神貺惟歆淵衷是格

祭伊犁河神文

朕受

命承家化綏億域懷神秩祀馨格一心爰從乙亥之春王師
申討始達伊犁之境時雨效靈津人既卽敘以救甯回部更
偕來而式廓波恬兩岸屢憑舟騎之通派合千山早受版章
之隸惟 神嘉貺翊我大勳萬里而遙久繪圖以攬勝五年
而近常揆藻以攄忱特崇齋帛之文肇舉祭川之典瑞升雲
物自今加澤邊氓功漑土田以歲長歆國祀浩浩崑墟之北
比于瀆尊洋洋蒲海之東昭茲坎德醴牲用潔遣告維虔

諭祭宋臣中書令濟陽郡王諡武惠曹彬文

勳伐紀于旂常官司秩祀神明憑其土地廟食垂麻苔氓庶
而報功訓臣僚以為憲維爾篤生燕境被澤吳邦早淳厚以
居懷夙清廉而飭行洵可謂靖共守位文武兼資者矣至于
金陵平定之功非徒謙德不矜之譽惜一城之生聚忍卽虔
劉誓諸將以焚香迄無肆刃祇此體天之寸念允宜馨俎于
茲疆

朕重涖江壖載昭祭典靈旂風雨尙降福于春人近社雞豚
永薦芬于秋稼肅然來止以克歆承
諭祭明臣方孝孺等文

穹壤之存忠義緜歲月而逾新豆籩之妥神明媿旂常而勿
替爰昭鉅典亦遣專官維爾方孝孺等閒代鍾英同時聚俊

屬明邦之肇造邁靖難以艱貞各守秉彝祇誓心以不二俱
扶陽德洵報主而靡他斧鑕甘之如飴綱常重之若鼎凜然
生氣豈人謀之弗臧灼厥先幾柰天意之有在於戲龍攀鳳
附不儕十廟于雞鳴玉潔霜晶自壯千秋于木末

朕重巡江國特畀禮宗薦以藻芳靈其歆只

諭祭明臣新建伯諡文成王守仁文

致君高匡濟之勳鼎鍾紀美聞道重守先之業俎豆垂光允
模楷之無偏宜苾芬之有恪惟爾稟資異敏造詣精深初不
畏于直言龍場被謫既克平夫逋寇南贛知軍泊乎迅定逆
藩甚者久滋讒口乃思田之招撫與八寨之掃除智慮彌周
神明愈湛雖德性超象山之悟語近禪宗而良知接孟氏之
傳祀從 文廟於戲功名學術氣節文章萃于一身風乎百

世

朕夙嘉乃喆重涖南疆望其桑梓之墟錫以蘋蘩之奠靈兮
來格咨爾欽承

敕建河神廟碑

河自達豫而下透迤入徐境道狹而曲勢迅而易沓過此復
透迤數百里乃挾洪澤之波以出乎海口于是障徐之衝頻
歲用力尤鉅乾隆丙子秋徐之孫家集奪溜亟命大臣董役
築塞惟謹丁丑春

朕重舉南巡夏四月涖徐親閱令官測量河身務祈大溜直
趨刷深復舊而于徐之城外增築石隄更培固諸岸工荷
天之寵庇 神之庥時則恬瀾順軌闕淤胥通彌望沃野興
耕民氣和樂夫崇德報功國有常典矧

朕夙夜齋心法

祖敬

天懷柔百神訖于四海所勤勤不敢少自暇逸冀馨香之孚格者凡以爲民維神佑國奠河護漕澤境功德之鉅克稱瀆宗我

世祖章皇帝開天肇宇化綏萬靈順治三年

敕封神爲顯佑通濟金龍四大王我

聖祖仁皇帝德協清寧省岳巡河

親籌底績康熙二十九年

敕加封神爲顯佑通濟昭靈效順金龍四大王惟茲清江暨

卓河並建有靈廟春秋永祀今神鑒

朕泣徐親閱之誠順軌效祥捷于桴鼓是所以保壤鞠氓滋

昌年穀者實惟神聰明正直潛佑默助之功爲多其敢忘

秩祀爰以其年命守土臣相地銅山縣雲龍山之北峻深允

吉創立新廟用崇申專祀祇報鴻庥明年冬廟成傑構旣

煥宜晉崇稱特加封神爲顯佑通濟昭靈效順廣利安民

金龍四大王龍德協應王齋載尊祝號不揚歆于萬禩惟是

河水之所經若山林川谷邱陵田疇屋廬自徐之上迄于下

舉可生遂我民者咸賴神之龔行天職以是惠是普又豈

惟澤永蔭于徐也與享事初行穹碑斯樹增舊典紀豐功流

慶無極敬作迎送之曲俾歌以妥而代銘焉其詩曰

導長源崑崙墟沛吾仁東海趨中涪瀾兮于徐暨上下兮舒

舒雲龍兮山起揚翠旌兮清光萬里靈之來兮春風田鼓兮

蓼蓼靈之下兮秋月稻香兮醇醇陳嘉醴兮簫管諧說吾人

兮龍堂開

右迎神

龍堂開雲鬣隸山凝華水澄采敕羣靈兮安驅望青天兮海
在靈之畱兮洋洋五土賴兮樂康靈之旋兮肅肅和氣周兮
百瀆願靈兮舒舒既安驅兮又甯居光前典兮饗于徐綏我
萬年兮潤中區

右送神

定北將軍一等誠勇公謚義烈班第墓碑

稽旌忠之大典疊賁榮光溯報國之中誠殊深惻念易名既
顯泐石斯崇爾定北將軍一等誠勇公班第英姿天挺偉績
日章歷踐巖封久以干城是寄預參密畫允惟帷幄堪資
朕鑒其經緯之材宣我柔懷之化畀專閫節薄伐津夷五月
爲期式廓誕敷之命一兵不試丕昭耆定之勳迺建上公實
襄遠略屬版圖之初隸值宵小之猝乘肘腋難安誓同袍而

蹈刃穹蒼可格先壹志以捐軀懷正氣以猶生撫新塋而載
悼諡之義烈慰厥幽冥於戲成仁取義歸來萬里之魂勒鼎
銘鍾不朽千秋之事欽予褒卹宜爾嗣昌

吏部尚書王安國謚文肅墓碑

維臣工之稱位首重清操必中外以宣猷彌堅晚節良模已
邈美諡斯傳爾吏部尚書王安國江甸鍾英巖廊振采巍科
蚤擢屢司柄于文章鉅任頻膺誕摠誠于政事出播仁風於
嶺海入襄懋績于鈞樞久作秩宗晉掌邦治守茲介石亮哉
夙夜之心翊我昌辰允矣中朝之望何沈痾之莫起遂溘逝
以長辭卹典具頒易名爰定諡之文肅孚厥生平於戲翠墨
摛華賁重泉之芬苾貞珉紀燉煥奕世之松楸勛爾後人敬
承麻命

擇石齋文集卷第一

終

擇石齋文集卷第二

秀水 錢載 坤一

奏摺一

恭進摺

乾隆庚寅

謹 奏為恭進詩冊事本年八月恭遇

皇上六旬萬壽慶辰六甲初周 萬年申錫海寓徧稱觥之

誼朝班先祝嘏之忱欽惟我

皇上至聖生安太和參贊 功隆孝治位祿名壽之彌昌

德備乾行元亨利貞之益茂 臣等宮僚職忝颺拜心虔自知

測識以管蠡猶願形容于萬一謹撰詩合一函計六冊恭進

御覽欣承 嘉運豐登萬寶之初仰頌 昌符戩穀九如之

盛

恭進摺 乾隆辛卯

本年十一月恭遇

聖母崇慶慈宣康惠敦和裕壽純禧恭懿安祺

皇太后八旬萬壽慶辰 茂德普昭 鴻庥緜彙

九如春永六千歲華實循環 五代福同十萬里車書拱

極肇黃鍾以衍筭續續律長增玉燭以含輝緜緜時泰海屋

之籌以萬數

壽紀齊天華封之祝以千聲歡騰應地斯誠隆古之盛未有

如今者也欽惟我

皇上孝治勤家 乾行秉籙 至性章施以有慶崇上

徽音 丕基鞏立以無疆敬敷

懿教 綸言疊沛推恩乎中外臣民 壽域宏開聚景乎山

川錦繡大哉化日光天之瑞應允矣重熙累洽之昌符臣等

幸備清班欣逢 盛典仰聆鈞樂固知莫罄夫形容俯效

衢歌猶冀稍伸其忱悃謹撰詩合裝一函計共六册恭呈

御覽

恭謝摺 乾隆乙未七月

本月十九日內閣奉

上諭內閣學士錢載著在阿哥書房行走欽此竊臣材本凡

庸識尤淺陋蒙

皇上天恩屢加賞拔洊廁清班每虞報稱之難常切冰兢之

懼茲者仰荷

天恩

特命臣在 阿哥書房行走

恩深獎勵溢分逾涯臣惟有遵循規矩勉走趨紬繹夙昔之所僅知殫竭討論之所必及務以上酬高厚鴻恩于萬一

恭報摺 乾隆丙申

竊學政例當歲底具摺臣蒙

皇上天恩督學山東于六月二十五日到任即于七月初七日赴曹州補前任歲考畢八月初七日至兗州始舉行科考兗州向分曲阜一棚二十七日至曲阜臣蒙

恩得循例祭孔林實爲至幸隨于九月二十三日至沂州十月十三日至泰安皆次第考竣十一月初二日回省考濟南十二月初四日至武定現在辦考約于本月二十四日可畢山東十府已考過五府矣來歲新正臣擬于未開印前起

程行九日先至登州開印即考登州遂考萊州而青州即趨曹州而東昌約于六月中旬此五府又可考竣回省後七月初即舉行錄科可于鄉試屆期之前一切告竣今年仰荷聖駕東巡

特恩廣童生新進之額大學五名中學四名小學三名通計山東全省當廣額至五百五十六名士子皆感

恩奮勉老童之入彀有八十六歲者而幼童之熟背五經亦多且今年係闕十二年舉行拔貢之年臣考過諸郡所拔生員實有少年英俊其人其文俱屬可觀者蓋先循例考經學古學一場臣又加覆試一場然後正科考一場覆試一場然後考拔貢第一場第二場凡經解賦詩四書文策論諸體皆備乃始得中選仰惟我

皇上文德覃敷深仁厚澤風教沾濡山川發育臣固在在爲
國家慶而實亦自幸蒙

恩得以樂觀其盛抑臣至愚極陋講論所及惟有敬謹敷布
聖天子樂育人材教孝教忠之實義務勸其束修自愛守禮
懷刑少壯者努力學問而樸魯者安居鄉里若夫釐剔考場
內外諸弊臣關防甚嚴提調官接訪甚力而士子實皆懷遵
功令竝未有鎗手冒籍頂替傳遞等弊至于文生武生有干
涉詞訟府縣審應斥革者立予斥革凡學政衙門案件例當
與撫臣文移會同臣固不敢失之寬縱而地方有司亦竝未
有欺侮斯文之處此臣半年以來所經辦者敬謹繕摺據實
陳奏伏祈
皇上睿鑒

恭慰摺
乾隆丁酉

臣在登州二月初二日恭聞

聖母皇太后升遐臣伏地哀號罔知所措謹摘冠纓仍卽按
考初七日疊接京報跪讀

諭旨命以

誥書頒到日外省文武臣始成服哭臨臣伏地舉哀未卽成
服欽惟

大行皇太后陛下

聖同

天德

慈在

帝躬四十二年

壽寧尊天下養百千萬事

仁厚造

聖人家遂古希逢寰瀛永慕仰惟我

皇上至孝瞻依長號擗踊

呼搶所至天地為悲臣蒲服難安蟻忱欲達伏祈

聖孝深自節哀重體

庭闈均調

寢食上絲

宗社無疆之福下荅臣民莫罄之心臣瀝誠繕摺無任迫切
恐惶之至

恭慰摺 乾隆丁酉

臣在青州府考試三月初七日接到京報驚聞二月二十有

八日 四阿哥薨逝臣莫知所以實切悲愴臣不諳禮節仰
惟我

皇上躬承大事即日

泰東陵萬年協吉

太廟升祔諸鴻儀

至孝至誠咸仗

聖心早晚恭行至勞至鉅乃于今辰適有天屬之戚臣伏祈
皇上慈懷隨時寬攝臣愚衷悚仄不敢不繕摺上陳伏惟
天慈俯鑒

恭懇摺 乾隆丁酉

乾隆四十二年五月初二日欽奉
孝聖憲皇后升祔

恩詔內外大小各官其陞級及改任者著照新銜封贈竊臣至寒極陋荷蒙

皇上鴻恩擢列二品得以贈及二代臣祖父母父母疊膺

誥命至榮至幸永戴永感今臣有所恭懇者伏念臣曾祖父

臣錢泮蚤世曾祖母譚氏半生苦節臣實不能稍盡烏私願

以本身妻室應得封典仰祈

聖恩賜贈臣曾祖父母臣生生世世報答難盡爲此瀝誠繕

摺上陳伏祈

睿鑒

恭謝摺 乾隆庚子

竊臣蒙

皇上天恩派至陝西四川行告祭禮臣於二月十六日自京

起程至陝西致祭

西嶽華山之神

黃帝軒轅氏周漢後魏唐諸陵

西鎮吳山之神凡十五處敬謹將事四月二十日至成都二

十一日致祭

江瀆之神敬謹如禮二十三日臣卽回程行至沔縣始見邸

報跪讀內閣奉

上諭禮部左侍郎員缺著錢載補授欽此臣當卽望

闕叩頭謝

恩訖伏念臣至愚極陋蒙

皇上加恩培植在 上書房行走豪無報稱茲復仰荷

聖心垂注擢佐卿班俾臣于蜀門道次恭聞

恩命循分悚惶感激無似臣馳至西安敬謹具摺附護理陝西巡撫布政使臣尙安奏事之便齎進臣卽日馳赴山莊宮門恭復

恩命恭謝

天恩伏祈

皇上睿鑒

恭謝摺
乾隆癸卯

本年三月內閣奉

上諭禮部侍郎錢載年力就衰難以供職加恩予原品休致欽此竊臣至愚極陋由進士出身蒙

皇上天恩選列翰林拔至卿貳擢入書房備承榮渥奈臣年已七十六歲兩耳重聽難於應對實難供職臣戀

恩戀

闕曰切悚惶茲屆京察仰蒙

聖主鴻慈格外矜全仍

予原品休致臣久荷

高厚栽培備員三十二年子孫家室皆受

聖主深恩感激涕零犬馬之心無可仰報來年春月恭遇

翠華南幸臣得隨浙江在籍諸臣後跪迎

聖駕仰覲

天顏舞蹈歡欣莫可言喻臣瀝誠具摺恭謝

天恩伏祈

睿鑒

稗石齋文集卷第二終

稗石齋文集卷第三

秀水 錢 載 坤 一

奏摺二

請釐定堯陵摺 乾隆庚子十一月廿三日

竊臣 今年奉

命告祭于秦蜀回道山西平陽訪得帝堯陵于城東北七十
里所謂陬山澗中者尋奉

命典試江南過東平訪向所祭堯陵于州東北二十里蘆泉
山之陽又臣奉

命督學山東時按試曹州道經平野遠瞻曹濮閒所祭之堯
陵今臣裝所搨平陽堯陵石刻六軸敬謹恭呈別摺錄其草
野之文石斷字缺謹硃圈句讀加貼黃簽以便

御覽竝錄乾隆元年禮部議山東撫臣岳濬請東平堯陵改祀濮州原奏乾隆四十一年大學士九卿遵旨議大理寺卿尹嘉銓奏平陽堯陵原奏于後臣前面奏平陽所訪得面奉

諭旨許臣次第查攷今臣徧考諸書詳釋史記體例臣至愚昧竊以爲當據漢司馬遷史記爲斷敬爲我

皇上一一陳之墨子堯北教八狄道死葬蛩山之陰舜西教七戎道死葬南紀之市山海經堯葬狄山之陽一名崇山二說似可不稽惟呂氏春秋云堯葬于穀林史記呂不韋列傳是時諸侯多辨士如荀卿之徒著書布天下呂不韋乃使其客人人著所聞集論以爲八覽六論十二紀二十餘萬言以爲備天地萬物古今之事號曰呂氏春秋遷蓋極形其侈濫

故遷之撰五帝本紀於堯亦不書葬所未嘗采穀林之說非特不之信也臣釋史記正文體例有以知古者帝王都于其所則葬于其所故遷之不書非闕文也五帝本紀黃帝既云未嘗甯居又云邑于涿鹿之阿遷徙往來無常處以師兵爲營衛是黃帝之都無常處也未云黃帝崩葬橋山惟以黃帝之都無常處故必書其葬所此遷史例也且于封禪書備載齊人公孫卿奏黃帝上天之事而于本紀自書葬橋山斯又遷之特筆已于是帝顓頊帝嚳帝堯皆不書其所都不書其葬所帝顓頊帝嚳之不書猶可曰闕文其在帝堯禹貢曰冀州夏本紀云禹行自冀州始後儒以爲尊京師五子之歌惟彼陶唐有此冀方然則堯之都冀可無書也堯授舜舜授禹皆都冀州而遷于帝舜則曰踐帝位三十九年南巡狩崩于

蒼梧之野葬于江南九疑惟以葬都冀州而巡狩至蒼梧故必書其葬所與黃帝同此實史記正文之例臣所云正文者蓋以司馬遷後諸書之言堯陵如皇覽如帝王世紀前此如呂氏春秋皆見收于劉宋裴駟集解以注入于史記不書葬所之下遂爾紛煩不一臣謹斷以史記不采呂不韋之堯葬穀林而先據諸本紀正文疏明其體例夏本紀帝禹東巡狩至于會稽而崩則不于其所都之冀州矣故必書其葬所然其書葬所也乃于贊語中云或言禹會諸侯江南計功而崩因葬焉命曰會稽會稽者會計也此則文章家之波宕然猶云或言者蓋慎之也于是黃帝之書葬舜之書葬禹之書葬凡三而文詞各別要之不崩于其所都故書葬則一然則堯之都于其所而葬于其所不書葬可以思矣殷本紀湯始居

亳從先王居則湯都亳矣然其崩不書葬則都于其所而葬于其所已周本紀既曰武王至周贊語又曰周復都豐鎬武王之崩不書葬而先是云九月上祭于畢則文王墓也贊語又云所謂周公葬我畢畢在鎬東南杜中此皆芻見之法臣今年奉命致祭周文王武王成王康王之陵得見周公太公伯禽從葬之墓皆在今畢原上則周之都于其所而葬于其所故不書實與殷湯帝堯不書葬之例一然則帝堯之都于平陽而葬于平陽可以信矣司馬遷云尚書獨載堯以來而百家言黃帝其文不雅馴故遷于以上本紀其體如是至于秦漢則近矣其所書葬又不可以例其前也臣謹再歷辨諸書之譌于後自呂氏春秋始云堯葬穀林司馬遷雖不采于史記而其說已流傳司馬遷武帝時人歷昭帝宣帝至元

帝時劉向諫起昌陵疏乃歷敘堯葬濟陰邙山皆小殷湯無葬處且云文武周公葬于畢皆無邙山之處則實與臣所見之邙山高大不合蓋向意祇在甚言薄葬非必考地志其云堯葬濟陰則沿誤于呂氏春秋也自此以後一說相承魏文帝好學王象繆襲等受詔撰皇覽皆記先代冢墓之處云堯冢在濟陰城陽仍劉向呂不韋也隋書經籍志皇覽一百二十卷如是之多則必侈必濫矣今其書不存臣謹指其一條云呂尚冢在臨菑縣南去縣十里以臣所見太公墓實葬于周之畢原文王陵左周公墓右且禮記太公封于營邱比及五世皆反葬于周以此思之皇覽所言未可盡信晉皇甫謐作帝王世紀仍皇覽之說云堯葬濟陰城陽西北四十里臣謹按史記正文堯即位三十八年而崩其下不書葬地而小

注乃駟案皇覽曰堯葬濟陰城陽劉向曰堯葬濟陰邙山呂氏春秋曰堯葬穀林皇甫謐曰穀林卽城陽堯都平陽于詩爲唐國此皆劉宋裴駟牽合諸書之一說相承而劉向傳邙山皆小已誤爲邙山以致後此諸書之牽引者至謂與正史相符正史司馬遷未嘗言也後漢班固明帝永平初受詔撰漢書至章帝建初中始成班固前望劉向百二十餘年其于地理志正文惟書成陽而唐顏師古又于其下注云有堯冢靈臺班固未嘗言堯葬處也至劉宋范蔚宗後漢書郡國志乃直書成陽有堯冢靈臺攷蔚宗八志未成而卒其補志乃蕭梁之劉昭後此而顏師古又已引郡國志以注地理志似此糾紛蓋魏之皇覽晉之帝王世紀其說方流傳也然則後此如晉書地理志之作于唐及宋史禮志凡書所引据

堯陵如前說者臣亦不敢多所敘辨以上煩

聖聽臣敬謹再疏明其事後漢書章帝本紀元和二年東巡

狩使使者祠唐堯于成陽靈臺此正文也蓋自劉向亦嘗據

呂氏春秋班固雖未之采然其說之行閱二百餘年度其時

濟陰成陽已定為堯冢又閱三十九年安帝延光三年東巡

狩遣使者祠唐堯于成陽此亦後漢書正文是即乾隆元年

山東撫臣岳濬奏請帝堯陵由東平改祀濮州為

國家有大典禮行告祭之處此臣從前在山東時所遠瞻于

平野略無山川形勝之結構竊計非帝堯諸臣皆大聖人之

所營建堯都平陽何事遠葬于濮州而所葬乃如是今訪得

平陽堯陵之靈境蒙臣恩許次第查攷然後知濮州所謂濟陰成陽處確非堯冢

也北宋歐陽修集古錄南宋洪适隸釋皆列後漢堯祠祈雨

碑修跋云延熹十年仲春二月陽氣侵陰又云享祀羣神又

云孟府君知堯精靈與天通神修治大殿以此知為祈雨于

堯祠也堯祠在濟陰郡适跋云右濟陰太守孟郁修堯廟碑

臣按延熹十年桓帝時也又後漢堯祠碑修跋云碑在濟陰

碑云帝堯者蓋昔世之聖王也又云李樹連枝生于堯祠太

守河南張寵到官始初出錢二千敬致禮祠熹平四年建臣

按熹平四年靈帝時也又後漢堯母碑修跋云其文略曰慶

都仙歿蓋葬於茲欲人莫知名曰靈臺上立黃屋堯所奉祠

臣按此似憑空附會之辭後云故廷尉深惟大漢堯之苗胄當修堯祠于是修

按皇覽云堯冢在濟陰成陽呂氏春秋云堯葬穀林皇甫謐

云穀林即成陽然自史記地志及水經諸書無堯母葬處惟

見于此碑蓋亦葬成陽也而諸書多為城陽惟此碑為成陽
 适跋云右成陽靈臺碑靈帝建甯五年立與堯廟二碑皆在
 成陽于是适按兩漢地志濟陰成陽有堯冢靈臺不明言靈
 臺為堯母冢也章帝紀元和二年使使者祠唐堯于成陽靈
 臺注引郭緣生述征記曰成陽有堯陵陵南一里有堯母慶
 都陵稱曰靈臺据此則與碑合靈臺非堯冢明矣臣按今後漢書注云郭緣生述
 征記曰成陽縣東南有堯母慶都墓上有祠廟堯母陵俗亦名靈臺大母並無成陽堯陵陵南一里之句不知洪适所据者何本

碑第二碑修與适所跋確是堯廟堯祠第三碑亦云當修堯
 祠修跋此碑似猶疑堯母葬處乃引皇覽呂氏春秋皇甫謐
 而云亦葬成陽者意謂帝堯蓋虛辭也若修所收之碑文確
 敘堯冢則何必引書以為據至适跋此碑云靈臺非堯冢明
 矣蓋信章帝之成陽靈臺而直闕郡國志之大書成陽有堯

冢靈臺也据此濮州夙有堯廟堯祠與堯母靈臺而未嘗有
 堯冢臣又覆考隸釋所載孟郁修堯廟碑云聞帝堯陵在成
 陽遣戶曹掾具中牢祠又云與西宮學生又云修治大殿是
 因祀廟修廟而先以虛詞敷佐而照耀之故曰聞若其有陵
 即其地敘其事何必曰聞又覆考堯祠碑云復舊典造立靈
 廟以一太牢秩祠又云乃共立壇墀刊碑紀石是因重建堯
 廟而設壇墀未嘗先有陵也蓋堯陵未知實處而人之欲有
 堯陵于濟陰成陽者實其敬聖之誠然則章帝之祠唐堯于
 成陽靈臺祠其廟也安帝之祠唐堯于成陽亦非祠其陵也
 而後此之引後漢有三碑與皇覽帝王世紀諸書相附者並
 不詳釋碑文以分別祠廟陵之義緣好異之書如晉時所出
 竹書紀年云帝堯八十九年作游宮于陶九十年游居于陶

一百年陟于陶蓋陶邱在濟陰也然南齊任昉所收永初山
 川記云堯先居陶後居唐曰陶唐氏也至唐之魏王泰括地
 志云故堯城在濮州鄆城縣北引竹書云昔堯德衰為舜所
 囚又有偃朱故城引竹書云舜囚堯復偃丹朱使不與父相
 見此皆右穀林之說者必欲附會堯之嘗居濟陰且陟于濟
 陰則度必葬于濟陰矣後魏酈道元注水經備引成陽有堯
 陵有堯母慶都陵有堯妃中山夫人祠然于後結束云攷地
 驗狀咸為疎僻蓋聞疑書疑耳自濟陰既當有堯陵好事者
 附之堯母慶都陵又附之中山夫人祠道元在後魏時已無
 可攷驗槩之以聞疑書疑然則濟陰之無堯陵信矣臣考今其處惟存徐
世雄書帝堯墓三字一碑而世之引水經注以考堯陵者但繇稱其前幅而脫
 畧其末尾殊失酈道元所以備引之本意東平之祀堯陵宋

開寶詔祠堯于鄆州鄆州今東平也明洪武四年祀堯于東
 平祭文云遣官奠祀修陵臣昨訪蘆泉山處陵在平地後立
 一甃牆冢高四尺貼牆出小頂前去頂尺餘一雲龍紋石片
 平其上左右前各鑲立一石片如擁護然臣于石片缺處仰
 瞻鬆土敲落有斷甃零石而貼牆小頂生草一堆其地之前
 稍左有東鬪山西鬪山斜走缺斷略無環抱斷然非帝堯葬
 處此岳濬請改祀濮州禮臣議准不為無據也至尹嘉銓之
 奏平陽考据未備廷臣議駁自當慎守舊典今臣攷得後漢
 王充語堯葬冀州此語僅見于南宋羅泌路史其子羅萃之
 注且以為妄之甚蓋右濟陰之說者必廢平陽之說則此語
 蓋實也臣又攷得北史魏孝文帝本紀太和十六年祠堯于
 平陽此亦祠于廟二十一年至平陽遣使者以太牢祭唐堯

此當祭于陵先是二十年遣使者以太牢祭漢光武及明章
 二帝陵唐高宗顯慶二年帝在雒陽宮遣使者以少牢祭漢
 光武後魏孝文帝陵蓋凡書祠者當是廟凡書祭者當是陵
 夫在孝文時猶常修祀于平陽而酈道元父酈範孝文所任
 用道元仕宣武孝明之時水經注之于濟陰已云聞疑書疑
 然則平陽之蹟猶自昭灼而濟陰之蹟固已渺茫矣且孝文
 帝自代遷雒其時江左劉宋蕭齊之遞嬗所以濟陰之一說
 自沿于劉宋裴駟而孝文之太牢自行于冀州漢郡臣按後漢書郡國志
平陽屬河東郡 據此為斷則後此如唐開元五年詔褚無量祠堯平陽
 之見于史者臣亦不敢多引以上煩
 聖聽今臣訪得平陽堯陵乃是地中有山也今年臣蒙
 恩遣祭黃帝陵于中部縣橋山見橋山之靈境猶未觸地中

有山之義及見堯陵于陬山與黃帝陵各形勢而氣象同易
 曰地中有山乃知四周山高起憑其回環曲折不斷於其入
 處如入地中比及見地山乃安于地上水自深于地中蓋地
 在山中也臣無簡明之筆謹瑣陳兩山之形勝洛水在橋山
 東自北流南入宜君縣境折而西以北趨黃河延緩慶陽之
 閒有山曰西山延長千二百里以起為橋山穹然橫互九里
 黃帝葬穹處下古柏千株其前平出則立土直下際水之行
 路也其後華蓋三峯擁之三峯垂下即起其接斷處墳去一
 石形家所謂過峽也四圍而中空如橋橋山之名以此其右
 山連後峯轉而出立土如嶽體十數里回于前為橋山對面
 之山盤陀黃石墳去聲其下坦如開懷橫疊小土山八九層皆
 與橋山勢相讓相合又環而左際水山腳重重抱于橋山左

而後峯轉左之山脚出與相錯蓋自右回前轉左復趨後之高山四周如環其頂如平垣而平頂之外無一峯尖四周之內無一矗石實則四周山之下與橋山三面之下如鑿空然皆地也所最神者右山肩落一水曰沮水先分一流入峽之石中出于左而前其右之一流深于地中自後而前復自右而左過中部縣繞橋山前轉左以趨後恰與峽中出者會蓋一水之分而復合爲一氣也左肩又落一水俱合于橋山左掖屈曲出以會洛水而左折于對面山之外其初之入自橋山西經耀州南兩山狹路中二百餘里東折而上延長百里之高山宜君縣立山上也過此逶迤北折而坦兩山相夾不啻入于地中則見橋山矣陝山之堯陵平陽城東北四十里村徑漸狹而坦有坊曰堯天咫尺于見土山夾入蓋土門也

漸坦漸下如入地中則見左右土山皆壁立村居種作寬窄隨灣其外西也遠山環之其內東也一水西出右之壁立乃陵背之他山轉前爲陵之對山自東而西以出于左三十里其頂參差不斷而入者當爲右也左之壁立乃陵之本山右肩衡分自東而西以出于右三十里其頂參差不斷而入者當爲左也蓋堯陵南鄉也左右之相距至窄亦不太寬而兩壁之立無可以路而出也初高二三丈四五丈皆立土至頂漸則大小黃石層疊于下其上立土至頂更入更高左之疊石較多於右祇一路跨水左右至于陵而止臣按山名曰陝峽隅也于義爲通其中水口大石脚高低層疊漸如棧行再入又一口則石大且多水衝下矣再入大壑大巖左右過水行無路處其上大石灘落水再入再折石多水急少可種作行于巖上俯聽水聲

于是徑益仄崖益峻乃高石壁列左如排而右亦蒼然高此大川嶽鴻蒙氣象也乃大石平出乃壁立之土頂下或盤陀石疊疊十數層或小方石疊疊數十層于是大平石左而出右而出水屈曲其間蓋自山口以入不啻入于地中乃大轉大折于高壁大峽中以入于右古柏如蒼虬則見陵山矣陵山純土其左其前直下際水其右低畝許今種作也其上平如地三四百餘步後擁五峯圓頂連排小方石疊成亦不見後山之頂五峯垂下起爲翠阜左頂高一百五十尺右頂及其半廣二百餘步春生之氣盎然和粹神明在焉其前猶存小殿三楹兩廡各三楹蓋此一百五十尺天然之土安于平如地之山上也其南則對面之山十數小圓峯坦如開懷下爲石場際水皆盤陀黃石比至陵前盤陀黃石左縮右伸與

上左高右低之翠阜若相配然所最神者一水自陵山之背後山之根夾出于左而右轉至立土之左掖轉前過右而復出于前則高壁大峽閒矣一流三十里出于外口之左若無此水則三十里至于陵氣塞不通終古荒絕也若非此水則至于陵且路而他出矣臣敬謹瑣陳兩山仰祈聖心俯鑒黃帝諸臣帝堯諸臣其所相度營建不必相同而實有相同之形勝臣謹按陬山之金泰和碑亦云穀林之說獨出于皇甫士安之屬又云蹤跡明甚元碑所紀猶可徵信明碑云徹唐太宗像平陽志云唐太宗征遼過此拜于墓下自塋像以配帝堯然李唐陶唐罄心援附則堯陵當日口耳相傳實在平陽唐太宗起于太原必稔平陽若非自塋像後人何以塋像于荒陵明碑又云今日始廟而祭之荒山之中

蓋其時方祀堯陵于東平何敢誦言也夫帝堯之神明自在
宇宙閒亦何擇乎山東山西帝堯之陵天地皆將祐之豈有
或然之慮然求其真而覈其實恭遇

皇上七旬萬壽大慶之年嘉澤普洽神人麻暢來春

翠華巡幸五臺堯陵適在山西界中前者臣仰聆

諭旨從前議駁之後

聖心常想堯陵當在平陽何以有遠葬山東之事今臣所攷
大段如是伏祈

聖裁釐定四千一百餘年久湮之蹟實亦天心有待陶唐氏
之遺民臣與之問訊口耳相傳欣欣樂道豈特如金泰和碑

所云蹤跡明甚也臣愈陳愈瑣戰栗悚惶伏祈

睿鑒訓示施行

再陳堯陵摺 十二月十六日

竊臣遵

旨次第查攷堯陵攷得平陽之堯陵屬實濮州之堯陵屬虛
敬謹具摺覆奏奉

旨大學士九卿會同該部議奏欽此禮部主臬議駁覆奏奉
旨依議欽此臣自應默息何敢復陳但臣原奏祇辨堯陵之

有無竝未嘗敢一字涉及改祀之處然卽此一事之議禮教
攸關臣敬謹再奏竊以堯葬穀林之說實始于秦之呂不韋

而牽合漢劉向堯葬濟陰及班固漢書地理志成陽屬濟陰
郡以傅穀林之說實由于晉之皇甫謐其辨駁濟陰成陽之

無堯冢者莫詳于後魏酈道元之水經注水經注云帝王世
紀曰堯葬濟陰成陽西北四十里是爲穀林臣謹按此卽皇

甫謚之牽三說而合之也其下接注云墨子以為堯北教八
狄道死葬蛭山之陰山海經曰堯葬狄山之陽一名崇山二
說各殊以為成陽近是堯冢也臣謹按以為近是則成陽之
堯冢猶未見為確又云余按小成陽在成陽西南半里俗諺
以為囚堯城土安蓋以為是為堯冢也臣謹按囚堯城本屬竹
書之荒唐況以是為堯冢則道元之辨駁成陽無堯冢而心
非皇甫謚也蓋已太甚然後于其注之又一段備言今成陽
有堯陵有堯母慶都陵有中山夫人祠俱詳里數其所謂今
者州縣之所興設有此現在也乃復引郭緣生述征記所言
成陽堯陵中山夫人祠堯母慶都冢俱詳里數以見今與古
里數參差不合夫祠可移徙陵豈有移徙者何以今與古里
數乃不合于是其結束云考地驗狀咸為疎僻蓋聞疑書疑

耳則并郭緣生亦槩斥之矣臣謹據此道元之三層辨駁臣
所以信濮州之堯陵屬虛然臣之所以信平陽之堯陵屬實
者臣前奏謹據漢司馬遷史記五帝本紀夏殷周本紀正文
之例為斷蓋因呂不韋劉向皇甫謚之說皆收于劉宋裴駟
史記集解以注入司馬遷不書葬所之正文下其在司馬遷
周以前本紀之例古帝王都于其所崩于其所則葬于其所
者皆不書葬何以明之即以其不崩于其所都者必書葬以
知之如黃帝之遷徙往來無常處則書葬橋山如帝舜之都
冀而崩于蒼梧之野則書葬于江南九疑如帝禹之都冀至
於會稽而崩則書云或言禹會諸侯計功而崩因葬焉命為
會稽惟此三書顯然成例臣以是知帝堯之都于平陽崩于
平陽而葬于平陽不書葬則今平陽之有堯陵蓋其實已至

于秦漢之世近而皆書葬臣前奏云不可以例其前也又據後漢王充語堯葬冀州此語僅見于王充臣前奏云右穀林之說者必廢平陽之說所以王充僅見此語臣以是知堯都平陽爲冀州則堯之崩于冀而葬于冀者實在平陽又據今陝山堯陵明碑云徹唐太宗像此等無名之碑誠不足據然唐太宗之舊有像而徹之不必誣也卽平陽志書亦何足據然相傳唐太宗自塋像以配帝堯臣前奏云唐太宗起于太原必稔平陽若非自塋像後人何以塋像于荒陵蓋唐太宗侑座之像嘗自塋于帝堯今日陝山之陵則帝堯今日陝山之陵猶未湮于唐太宗平陽之世臣亦何心臣以是知平陽之陝山實爲堯陵況今陝山靈境鴻蒙氣象無可華飾非可游翫臣口不能言筆不能述臣前奏謹以所見黃帝之橋山

比絜者伏冀

聖心俯鑒黃帝諸臣帝堯諸臣其所相度經營不必相同而實有相同之心跡此非親至其地者不能知今廷臣皆未嘗親至其地原不可輕信臣言遂以爲可據臣敬謹戰栗伏祈皇上聖心俯鑒定司馬遷良史材正文之例黜呂不韋門下客浮說之譌辨皇甫謐牽合兩說之由審酈道元駁翻三層之確念唐太宗之李唐陶唐罄心援附而惜王充之傳疑傳信片語僅存以對荅臣帝堯之神明以昭彰四千餘年荒山幽邃之中春氣尙存之蹟以振起人心于萬古臣敬謹戰栗具摺伏祈

皇上睿鑒訓示施行

十一月十五日蒙
恩召見十六日上再陳堯陵摺奉

旨仍著大學士九卿會同該部議奏二十三日議駁二十五日覆奏奉
旨依議

擇石齋文集卷三

三

擇石齋文集卷第三

終

擇石齋文集卷第四

秀水 錢載 坤一

策問

乾隆二十四年廣西鄉試策問三首

問性學治化之原也性體明而性端擴則曾子所述格致誠
正以迨修齊治平胥統焉欽惟我

皇上建極綏猷文德洽乎臣庶武功徹乎中外頻歲邊徼臣
所未臣奉表而拜 闕廷者踵至

聖化之盛史冊以來蓋未之有顧惟正大一本於
聖心淵粹一基於

聖性光天之下咸其見聞士生斯世可不復性自修以仰承
栽培之至教且爲臣子者殫厥心于發動之處從茲推暨固

將以裨益治化于萬一則性功亟矣孔子曰性相近孟子曰性善其旨可合闡與孟子之言性善安所本與且卽孟子言性諸章辨晰之融會之所言情與才豈有所斡旋與異于孟子而言性者苟況之後莫一豈孟子性善之言尙有未盡與迄乎宋儒始分義理氣質而言程子張子朱子遞暢其說然後性善之旨益明實則情與才孟子固引其緒也夫然性固皆善矣至於下愚之不移者可移與其終不可移與夫孔孟之關鍵性功治化中庸盡之今先探大道之本體認生初其各著于篇

問至聖詔小子學詩曰邇之事父遠之事君自身而推邇遠之間則固有兄弟夫婦朋友在夫使人倫紀由性情以正而天下可治矣我

皇上經緯鴻文曰新富有

御製篇什寶踰數萬皆大禮大政攸關以逮山川名物含茹古今發宣祕奧茲蒙

欽定科制第二場試以唐律則夫詩學源流正士林所宜熟講三百篇風雅頌興比賦之義若何方夫子正樂時而雅頌始各得其所蓋詩有入樂不入樂之分則六義當先別識之矣且周公大聖人也周公大制作之列于篇者可得而陳其槩與五言旣興遂推漢魏漢之古詩樂府猶有壹倡三歎之遺古體今體至唐始備顧自晉以後組織之文詞居多而自然之元音益少諸生試取漢魏兩晉南北朝三唐兩宋遼金元明逮我本朝諸詩家沿流討源第代舉其大者論列之已足以觀師法儻其融貫三百之大義切于治道者以爲言

斯固

朝廷期待士子實學如授之以政使於四方者也則尤有厚望焉

問禮教之行民風斯厚是固然已伏觀我

皇上作述丕昭仁濡義湧

諭旨時頒諄諄於世道人心風俗爲士民誥誡卽如

欽定科制崇實去浮禮教之先莫切乎是蓋士首四民誦詩讀書者不能反本務實而徒責椎魯者以扞網可與是以君子修于身修于家雖仕進而行有命至或善其宗族善其鄉閭固性分事也亦實效忠之義可無導俗之方與古禮精意大抵爲人道之始人道之終而不越乎孝弟兩端今所行冠昏喪祭之常豈宜隨俗以苟安與且飲射讀灋謂非風俗之

綱維與凡諸義類上則恪循 令典所昭垂而下亦當約守

儒先所輯定然必若何而洽乎鄉黨使油然而知王道之可親而王法之可免與夫刑以輔禮刑以弼教斯誠

聖主不得已之心也方今幅幘之廣農工商賈莫不各安其所生蕩平正直盛哉大治顧扞網者猶未絕而無知之婦孺孰嘗提耳而日告之夫讀灋抑末也所以待椎魯之民則如講讀律令之條必若何而實心舉行更無滋擾與諸生苟能自淑而有以及乎宗黨鄉閭古云王道之易易其在斯與

乾隆三十年江南鄉試策問一首

問刑以輔禮禮禁於未然之先法施於已然之後其在小民平日若明知禮意而身蹈于刑者固少也我皇上仁育義正因時翕施每歲

欽定秋讞惟詳惟慎蓋日以刑期無刑爲兢兢所以籌億兆之生全者至矣伏讀

大清律文條條與禮意相準其講讀律令一條所以告戒提撕于未然之前非卽禮教之顯寓于刑中者乎今天下縣令千二百有幾終歲按律以議刑而小民不識文義固未知律令之所以然也則于平日先與民講說以如是則不違于禮而免于刑不如是則禮違而刑不得免其可實力奉行之與周禮讀灋卽今講讀律令也每歲閭胥族師黨正州長皆屬民讀灋其時日疏數可遞詳與今一縣自令而外學官丞簿尉皆可以講讀律令之官也若隨其坊村堡鎮分任而迭蒞之似亦可行顧臨以官長限以月日又恐其流于擾而不免于累宜若何而始盡善與夫教民防民術亦多矣盍言其可

使知禮者

乾隆三十九年江西鄉試策問五首

問讀書不可無書而寒士亦焉能得書夫博極羣書原不以槩之經生然史家藝文志類家經籍考是則所當援據者我皇上盛德日新博稽羣籍

詔求天下遺書開四庫全書館彙鈔祕笈

親加甲乙至于

賜題宸什以還其獻書之家斯誠亙古所未有夫亦風示天下士子興起其讀書好古之心以庶幾成國家有用之材也江西所稱理學節義文章之鄉也諸生仰承

聖化挾策而來請卽如藝文經籍編纂書目之法門中有類條其大凡且前人之編纂書目以何者爲最善昔蘇文忠記

李氏山房藏書謂後生科舉之士皆束書不觀諸生幸逢今日宜不爾也盍卽以對

問士風之振必先於教士我國家學官之外直省復設有書院頒書給廩又郡縣各立書院義學資之膏火然則未嘗無教士之地也夫教士之方諒不惟規規于月課科舉之業蓋端在司教者已白鹿洞書院四大書院之一朱子之教規本末終始夫固大學之方也試疏明之餘干胡先生主洞規訓其於朱子相發者若何從前蘇湖教授之法似較簡直而鹿洞之教規其相該者若何江西書院最盛其嚴立教條與曾仿洞規者若何諸生讀聖賢書皆將有教士之責且寒士授生徒于鄉里講之素矣其各抒所見於篇

問文章以適于治道者爲貴董子射策皆適于治道之言老

蘇公所謂孟子之文韓子之文歐陽子之文者表裏治道可得而思我

皇上欽定唐宋文醇以嘉惠天下士子廬陵臨川南豐諸生之鄉先賢也亦旣服習之矣豈不能取其文之適于治道者而深言之與三先生之後明于道而傳于文若吳虞揭范諸先生者豈不能遞言之以相益與夫策非帖書墨義之謂對策以抒其所見爲長諸生應科目人也卽制舉之家章陳羅艾深言其所得亦猶可相見於學問之心蓋無古無今惟其一是一是斐然輸寫竊所願聞

問今

朝廷常平積穀蓋自雍正年以來法久而善顧民間卹民之事必坐以待給于官在夫三十年之通固王政之本計然必

坐而仰給于官民氣日散而宗族鄉黨不相救患徒以望歲之無旱溢難也夫民間之相卹莫善于社倉朱子建安五夫社倉記謂法本隋唐當時孝宗下其法于諸路江浙近郡未行而江西先行見于朱子建昌軍南城吳氏社倉記以故社倉之法在江西也則夫昉隋沿唐後行之於朱子者其可修舉而無弊與夫義田及一族社倉及一方社倉行而一方雖遇旱溢人不缺食若由一方以推行之萬方得治其禮義以免于刑罰此非理勢之必無者江西一姓同居各成村落苟其行之卹宗族而救鄉黨亦足以上裨朝廷仁政之萬一然而圖其始也難慮其終也難夫社倉固非主之于官者也幸備言之

問刑非得已釋孔孟之書自周而已然矣我

皇上好生如天欽卹民隱每歲秋審于無可寬者乃寘之法甚矣天下臣民所當轉相告語以盡知聖意也夫刑以輔禮刑以弼教董子曰禮禁未然之前今將使不識字之村氓入耳儆心知所畏懼而不敢犯入目儆心知所卑尊齒德而不敢犯計無有切于鄉飲酒讀灑者推原周禮之意酌取唐宋之規假如一鄉一縣禮教相敦而官不別設其可行與其不可行與自刑名錢穀皆責成於縣令而丞簿尉如冗員竊以爲此中卽有可任申明誠諭者況里黨之閒長而賢者自不乏也惟簡而恆無滋他擾其可行與其不可行與試善籌之

乾隆四十年乙未科武會試策問

問文武二柄道總而途分 國家設武科以收人材又與拔

自行伍者分途竝重今者多士挾策而來孫吳司馬之書能撮舉其綱要與爲將之道知信仁勇嚴五者不可缺一而兼之者其難能援古而深言之與結陳之法訓練之方拊循之術號令賞罰之權心周者必協乎機善制者各因其地能區別而槩陳之與我

皇上聖武丕昭徹於西北之邊東南之徼

神謨廟算卽誦習孫吳者莫能仰識且師武臣之宣力疆圉多出於滿洲世臣舊族是蓋古者三軍將佐皆出自卿材也公侯腹心之寄原不廛武科一途而所以慎重武科者親臨閱試詳加甄選尤嚴於初進則多士之觀感而奮興者講於韜略必有本矣其各抒所見於篇

乾隆四十四年

恩科江西鄉試策問五首

問漢甘露間詔諸儒講論五經同異于石渠建中初會白虎觀議論五經同異此皆是正文字不獨訓詁大義所以至後唐令國子監校正九經以西京石經本鈔寫刻板頒行天下而唐之五經文字九經字樣經典釋文皆已雕印則漢以來諸石經本皆已旒綴也我

皇上日新富有四庫全書之寫進者千函萬帙

親加校定攷義釐文豈止五經是正然待試諸生之蒙

頒發五經義疏于學宮者久其經舉一條將于此以覘夙學

易重卦之相生初主京房卦氣迄不能定迨陳搏畱語弟子

乾一兌二離三震四巽五坎六艮七坤八凡十六字而卦象

乃通然與洪範之傳蔡氏以前尙有其至醇者與詩用朱義

大端盡舉矣而鄭風之不據舊說淫奔之篇二十四然與小戴禮月令與大戴禮夏小正其孰優春王正月之辨改時不改月與豳風七月之月日同與不同與

聖天子振興文教文字固所是正訓詁尤在大義諸生其各對所聞

問學校至今日而益盛我

皇上振興文教首重學校今歲己亥

駕幸

避暑山莊先是

詔建文廟于熱河升承德州爲府

御製詩并記棗于碑至日

親臨釋奠新設學宮之諸生俱蒙

賜賚禮教覃敷設學暨于上塞自古所未有也夫學校之制孟子舉其大端已然見于小戴禮者名義不同其有小學有大學又鄉遂皆有學有右師有左師皆所以教之也可得而疏明之與且鄉遂屬民讀灋之節尤至切其可舉行與唐之設國子監始盛至宋元豐立三舍升補法其猶可行之與學校之教孟子謂申之以孝弟之義皆所以明人倫舉其大者蓋莫外此然綜而言之謂其教則五事五典其學則六德六行五禮六樂五射五御六書九數夫師保氏所掌地官職也矧是賓興其可不疏明之與且江西書院之重白鹿洞之規條鷺湖之會講皆學者平日希風自勵之所在也其悉著于篇

問察廉昉于西漢其時九卿察廉三公察廉郡國察廉縣道

察廉皆選舉實考課也我

皇上綱紀萬化嚴察吏治監司守令之賢否在

聖心運量之中固非墨守古法者之所可得而仰窺然多士之進而試于有司也非古訓其曷式與周禮小宰以聽官府之六計弊羣吏之治廉善廉能廉敬廉正廉濇廉辨所謂六事以廉爲本與大宰八灋八曰官計以弊邦治卽小宰之六計而虞書之三考黜陟與漢嘗立考功課吏法令丞尉治一縣崇教化無犯法者遷有盜滿三日不覺尉事也令覺之自除尉負其罪宰相準如此法漢吏之賢卓卓可紀者何若與江西在昔之官斯士者宋均之退姦貪進良善虎皆渡江而東陳蕃之方峻謝客惟禮徐孺子獨孤及之暇則琴書自娛何易于之昔無儲今有餘若夫周子之辨分甯獄南昌黠吏

爲斂迹朱子之多方振卹並給貧生得肄業謂非其可風者與生斯土也盍由是而博徵之夫所心儀于在昔者某氏某賢與尙其操他日臨民之左券

問史記注在邑曰倉在野曰庾甚矣古人名實之義也夫社倉在民而不在官故便如其以事之涉而在官則先事之弊後事之累社倉且自受之何暇復顧饑歲之紓民哉我國家縣置常平倉自雍正閒立法儲穀我

皇上仁心普被以時整飭官吏常平之糶實利及民原亦無藉于社倉今江西之社倉若何宋乾道社倉其實不自朱子始也隋長孫平請令諸州勸課當社共立義倉後又置社倉卽義倉意也唐亦置社倉義倉令畝稅二升其狹鄉據青苗簿而督之此宋青苗法之在官而厲民之原也宋亦復置義

倉社倉惟朱子振民于崇安是年有秋民願以粟償官後乃
仿古法爲社倉俾願貸者出息什二歲小饑則弛半息大祲
則盡蠲之今之所行其若是與論者謂是倉處于諸邑之里
社主于鄉曲之士君子脫遇阻饑朝取暮獲今蠹蝕者空倉
無一粟之儲而吏胥且踵以至貧民豫必其難償不蒙一粟
之貸而先後司社容隱訐告之不免然則仍社倉之虛名而
受青苗之實害矣其何以修復朱子之舊使朱子之初心澤
及于後世而在

朝廷亦得收民間自利之裨益與諸生誼關鄉里其直言毋
隱

問古文時文之分蓋謂體裁也若其義與文約六經之旨以
成文先正之名時文者皆自古文得之蓋六經之文皆文也

不獨秦漢以來我

皇上嘉惠士林

欽定唐宋文醇以疏其原以培其本復

御選四書文以懸之鵠而正其趨又復

頒唐宋詩醇以澤之風雅而博其趨斯皆先民所已由之大
道由乎此以上溯六經至近也至切也由乎此而深造有得
焉心術人品事業未必不于此而出夫人惟不學則已學焉
未有不有得者也今諸生之學于此三書也有年矣試舉唐
宋十家文之所得若何且歐王曾皆鄉先賢也能言其所以
得者若何與唐宋諸家之詩其旨趣若何其立身行己若何
明代化治正嘉隆萬天崇之四書文風氣家數若何
本朝大家名家之文之所得若何諸生能就三書撮其大綱

而行文以自見與夫

朝廷待士至厚教士至切至備舍三書不學而徒希自進於有司諸生豈其然與盍自言之

乾隆四十五年江南鄉試策問五首

問子所雅言詩書執禮其時詩書殆有全經而禮未有成書故曰執禮然則周禮周公致太平之書孔子所未見孟子所言又與之異後來疑周禮非周公所作然與詩書既有成書何論語引詩多而引書少孟子又謂盡信書不如無書周爲孔孟本朝豈其四代之書史臣撰記精粗深淺之有未安而周書于鋪張揚厲之際有太甚與論語謂人不爲周南召南其猶正牆面而立試推言其所以不可不爲之故且孟子謂詩亡然後春秋作若以風無可采魯隱後諸篇具在詩固未

嘗亡也若以孔子刪詩遂修春秋則此之作非列國赴告策書之體矣可得而申言之與加年學易一見於論語而四書更無易字今之十翼非孔子時書與繫辭皆孔子所作與且周子之太極非易之太極與我

皇上親校四庫全書首重經傳別擇收羅至精至備承學之士當觀其會通盍各抒所見以對

問文者載道之器而文體之正治道攸關我

皇上欽定四書文嘉惠士子俾理由此明道由此體立心由此其端而從政亦由此其達

諭旨頻頒復特舉有明歸有光黃淳耀

國朝熊伯龍李光地輩之文爲之準則士子誦法有年矣盍歷舉而深言之明代諸家之文

本朝諸家之文其得力于經得力于史得力于子得力于六經後諸古文辭者若何代不數人人不數篇考其人物學術政事蓋實有其原本而不可以易幾也夫是以

聖心諄切復

欽定唐宋文醇唐宋詩醇

頒于鬢序俾由此學古深造以上通乎四子六經且非徒大正其科舉之業今既寢食于斯矣盍深言文醇詩醇諸家之所得者若何臚其人之梗槩疏其文之關係大小可各見也毋泛毋雜

問宋時郡縣學未徧立南渡諸先儒有書院之設所以為上助行教化也理學之風振而宋史列道學傳矣朱子與白鹿洞請陸子為諸生講論語義利之辨此至切也聚讀書者于

書院而科舉是習喻義則不利矣喻利則不義矣猶望其他曰功名不苟且哉此陸子之明健所為如棘斯拔也諸生以為切入于心與不切入于心與曰明誠兩進抑敬義偕立朱子白鹿洞賦之心也易與中庸盡之矣然則讀孔孟書于何而求其從入之端與程子視聽言動四箴論語集注錄之范浚心箴孟子集註錄之諸生試融會貫通而一申言之我

皇上學貫天人道崇洙泗建學至承德府塞上從古未有而直省書院徧設膏火凡以望多士之胥歸于實學公輔器也封疆任也著作材也我國家將厚賴之

問士習為民風所繫民風之淳必先士習之端我皇上深仁教育整飭體卹

諭旨屢頒周詳愷摯于士于民以時孚化蓋協氣其翔洽矣

夫士之與民同此州閭族黨故家巨室寒門小戶之所依賴而率從自有爲橫于鄉里者而民氣始競也馴而擾之一歸于禮王制六禮一曰鄉鄉飲酒鄉射也鄉飲酒義蓋儀禮有其事而禮記釋其義也正義謂此篇凡有四事一則三年賓賢能二則鄉大夫飲國中賢者三則州長習射四則黨正蜡祭皆謂之鄉飲酒然則鄉飲酒之禮試言其義舉而行之其易易與鄉射之禮試言其義舉而行之其易易與凡此齒讓之敦孝弟之生觀聽之親不言而喻且六禮之首曰冠試并言其義行之可易易與由是州閭族黨歲時伏臘貴賤之不相陵貧富之不相耀人無爭鬪而獄訟息俗鮮壽張而田宅阜諸生其引據禮經而言之亶亶也

問吏治輒以循吏稱首史記循吏奉法循理之吏也於是應

舉者皆習于兩漢書守令之故事而實學不存焉吏治之實求之論語可有餘師矣論語言政大之治天下小之治一邑今試舉問政諸章之近于守令者切實言之以申其義大江南北官于斯與產于斯者諸生昔嚮慕必有其先哲名賢試舉一二切實言之以見其志夫策必歸于治道董子天人三策是已諸生能究言之與文章足以華國而不足以治國議論切于濟時而不切于救時此宋人試策也策之所重非徒記誦端在言其可以實措諸施行者我

皇上訓飭吏治隨時隨地纖悉之洞照諸生既進于有司盍敷陳之以爲當宁獻

擇石齋文集卷第四終

擇石齋文集卷第五

序

秀水 錢載 坤一

乾隆二十三年

起居注冊後序

皇上大孝通於神明至仁浹乎民物

文德誕播

武功丕昭

天行之健日慎一日

乾隆之治日盛一日以迄于今二十有三年矣龍集戊寅春

正月上辛

祈穀首重民事也三月之吉

耕藉田

特飭除綵棚崇儉以示民

親製詔詞淵乎醇古軼漢而上孟夏

常雩禮成若夫有事於

園丘

方澤有事於

太廟精享於

社稷

朝日暨黑龍潭雨澤之禱凡以爲民固積歲而益虔實光

前而

孝達維春

躬謁

東陵

西陵申永慕式

詒謨由是釐工熙績以天下養以上承

慈寧歡內起居注觀鐙競渡之奉昇平佳節

慶洽天人問

安上

壽怡愉彌摯迺舉

經筵發

御論彙千聖百王之心傳用廣教於臣士夫孝爲德之本而仁爲德之元我

外 皇上錫類敷仁訖於四海九州萬國以故由近徹遠自中徹

文德之盛廓爲

武功伊犁底定後

命將勦阿逆之窟搜餘孽旣阿逆伏冥誅俄羅斯謹稟約謹獻尸告邊吏先是丁丑

王師宣

上德威哈薩克左部稱臣貢馬至是

駕秋獮于木蘭布魯特使臣來朝于布固圖昂阿先是乙亥平津夷噶爾藏多爾濟等丁丑哈薩克使臣根札噶喇等皆來朝于此今布魯特使臣又適來朝于此爰

賜名其峪曰伊絲嘉乃地靈之神奇伊絲者國語謂會極歸極也

御殿布魯特使臣列班舞蹈于庭復

幸盤山哈薩克右部暨塔什罕使臣俱至朝於山莊於是

大閱南苑俾諸外藩使臣咸得拜觀赫揚聖武繼霍集斯伯克之子漠咱吧爾來朝賜冠帶除夕宴外藩諸回部新降臣與焉天庥滋至

聖德靈承先事豫圖洞機神應六月

特旨派兵撥馬將以更易久在行間者而將軍奉

命定回部之逆酋大小和卓木旣克庫車存沙雅爾定阿克蘇略烏什收和闐直抵葉爾奇木城下過河者纔四百人斬將擐旗築堡黑水固守三月以待仰憑

神略師早在塗一趨進而己卯春正月夜擣賊營內外夾攻解黑水圍遂以奏拔達克山之捷回部悉平闢疆二萬里神

哉

廟算已卯十月之集勳實賴戊寅六月之先幾有以制勝於萬全至夫蠲租緩征加賑或借給牛具籽本直隸江南福建河南山東山西隨地措宜動費帑金鉅萬豫省加賑至三百餘萬截漕則總一千三百二十餘萬石蓋十倍于康熙雍正閒陝甘以軍務蠲賑尤倍甘肅至豫免已卯之租況于恤兵減刑京師則五城平糶而豫省河道全工方春督竣又開放駱馬湖尾閘芒稻閘爲諸湖入江路宣洩通暢皆勒碑其濱於是大江以南年穀順成復延頸跂幸允以庚辰春重舉巡典問我吏民至矣哉聖澤覃敷不遑寧逸乃

隆禮逮下于薨位者

臨視而奠于引年者

賜帑有詩孚感幽遐百度惟貞矣猶復以薄蝕

特詔求言書曰謙受益易曰謙尊而光我

皇上敬

天法

祖親賢愛民心周事先更心周事後維

仁德之大維

孝德之至德盛功隆生民未有臣等謹拜手稽首曰

九如

天保以垂庥于萬年茲編記

起居二十四卷藏之金匱推闡

聖政所原本洵莫罄形容也夫

宗廟考序

臣謹按天子宗廟之禮所重親饗至我

朝特隆焉唐以太宗貞觀之治親饗廟者二三年正月戊午

十七年四月庚寅耳自後合十七宗而親饗三十四

馬端臨謂懿宗一王應麟

上海作二咸通元年十一月丙子又四年正月己巳也宋自太祖親饗四合十二宗而親饗者八

十五然真宗之十二親郊朝郊朝享及告行告謁恭謝均非

時享祫禘之正祭仁宗之十三亦朝享及恭謝而親行祫祭

者一馬端臨所謂累朝惟此一親行也蓋宋之朝享太廟皆

郊前之祇告故每于十一月行之而正祭則未嘗親行我

太宗文皇帝肇建

太廟於盛京崇德改元四月丙戌大饗後八年之中親饗

二恢恢乎大一統之規模也

世祖章皇帝定鼎京師立

太廟御宇十八年時享親行二十八方順治十六年始行祫

祭而親祫二

聖祖仁皇帝御宇六十一年時享親行八十二祫祭親行三

十二

世宗憲皇帝御宇十三年時享親行三十祫祭親行十一

皇上御極乾隆元年至二十五年時享親行三十九祫祭親

行二十五是皆正祭而凡因事親告者不在此數於戲至仁

至孝至誠至敬之心永傳為

家法仰溯成周而後廟禮未有若斯之盛者也且今所行者

皆推本於

太宗文皇帝所定制也維時

聖節忌辰則以祭且薦新也元日清明中元除夕卽時享也

世祖章皇帝撫有天下追尊

四祖皇帝歲七享

太廟孟春諏吉清明四月七月十月之朔除夕

萬壽節則猶

太宗時制也至十三年建

奉先殿而日獻食月薦新朔望時節

聖誕忌辰元日冬至

萬壽節及諸慶典俱以行於

奉先至十六年始禘而除夕之享乃卽大禘矣

聖祖仁皇帝

世宗憲皇帝以來迄今每歲四孟享

太廟與除夕前一日禘祭而五則固皆崇德所行之精意以

遞酌而歸于至中昭其大文焉逮

世宗憲皇帝卽

壽皇殿虔供

聖祖仁皇帝聖容

孝思純篤以時瞻拜於是始有

神御之奉

皇上深推

世宗憲皇帝聖孝之心重建

壽皇殿以竝奉

太祖高皇帝

太宗文皇帝

世祖章皇帝

聖祖仁皇帝

世宗憲皇帝聖容暨

列后聖容又先卽

圓明園崇建

安佑宮奉

聖祖仁皇帝聖容而敬以

世宗憲皇帝聖容配於是

宮中 苑中

神御之奉乃上推而宵愜乎情與禮之極則丕不哉

聖孝繼述佑啓于萬年者也且復卽

避暑山莊

聖祖仁皇帝歲臨之 御苑建 永佑寺以虔奉

聖祖仁皇帝聖容則所爲齋焉而思其居處思其志意樂嗜
禮得其所必備而情得其所必伸蓋夫

神御之奉固由饗

廟親行至仁至孝至敬之一心推之以無乎不達者矣

羣廟考序

臣謹按 臣等恭纂

皇朝文獻通考內宗廟考彙本于乾隆二十七年閏五月十
八日恭進十九日奉

上諭續文獻通考館纂進彙本朕閱宗廟考一門內附入致
祀歷代帝王及本朝臣下家廟顧名思義于輯書體例何居
蓋旣以宗廟冠部則惟

太廟時禘典有尊崇方稱經常不易至
奉先殿之禮重家庭

壽皇殿

安佑宮

永佑寺之虔奉

神御于宗廟考中敬從附載尙爲不失禮以義起之文若撫
入歷代及臣下非惟其制絕不相蒙揆之分門本義亦復何
取卽云承用宋臣馬端臨舊式而往代儒生之識于大典未
克折衷盡善類此者政復不少又豈得違禮而曲泥之朕意
當于宗廟考專門備詳定制外其餘不應附入者別立羣廟
考一門隸之俾名義旣得所安而其書亦足垂遠館臣可錄
朕旨竝登卷中欽此臣等恭繹

諭旨仰見

皇上聖裁超越明禮辨分卽一書之改定而於禮之大典秩
然其有序於書之大體犁然其各當惟勿雜勿遺乃允歸于
至善今敬遵

訓示專輯宗廟考旣重加修飭而別立羣廟考以列于後首
載

歷代帝王廟昭備禮焉康熙六十年四月

聖祖仁皇帝詔增祀典迨

世宗憲皇帝初元爰定伏羲氏迄有明非偏據不入正統者
皆奉主入廟蓋自有帝王之祀于斯爲至次諸臣祠

列朝褒勳卹節諸臣宏被

恩施

世宗憲皇帝勅建昭忠祠賢良祠尤曠古鉅典我
皇上錫禮酬庸屢申慎重用以廣厲百職興起來茲是皆歲
春秋馨薦頒諸常祀若夫特行于歷代帝王與賢臣暨
本朝諸賢臣總曰特祀則不必于其廟祀也禮及陵墓者咸
附而殊禮之昭始備然後載京師王廟京師功臣祠此
則家廟猶古者諸侯之廟禮也然後載家廟之儀若親王世
子郡王家廟貝勒貝子宗室公家廟品官家廟至庶士家祭
庶人家祭而大夫士庶之廟禮胥在統之于
一王守之于萬世夫乃得窺
聖天子議禮精意俾我臣庶于羣廟考識禮之所以大則益
于宗廟考識禮之所以尊矣
蕻石齋文集卷第五終

蕻石齋文集卷第六

序二

廣西鄉試錄序

秀水錢載坤一

欽惟

皇上聖臨萬寓

文德武功光昭中外經緯精密織隱必周乾隆丁丑疊奉
諭旨申嚴鄉會試磨勘改定三場發題之制務核實以拔真
才其鄉試自己卯科始今歲屆期

欽命

臣

載偕

臣

斐峻典廣西試事伏念

臣

西浙庸愚由乾隆

壬申

恩科二甲一名進士蒙

皇上天恩拔置詞垣嗣於

御試暨引

見屢蒙

天語垂詢臣幸獲叨祿未有報效丁丑會試蒙

恩充同考官戊寅春

御試詞臣蒙

欽列優等冬月

命署臣日講起居注官今歲京察蒙

予加級茲又恭奉

恩命益切悚惶爰借臣雯峻星馳抵境入闈監臨則兵部侍

郎兼都察院右副都御史巡撫臣鄂寶協同點名則承宣布

政使司布政使臣葉存仁提刑按察使司按察使臣申夢璽

提調則分守蒼梧道管轄桂平梧鬱兼理驛鹽事務臣富明

安監試則分巡左江兵備道臣張日譽內監試則慶遠府理

苗同知臣徐良謹遵臣功令整飭條理進提督學政翰林院

編修臣鞠愷所錄士二千四百有奇局院而三試之臣載偕

臣雯峻率同考官知縣臣王曰賡臣楊方壽臣揭承堯臣楊

鳳騰臣汪元均臣邱堂臣顧旭明臣高文芳臣沈作霖臣張

昌蕃盡心校閱取中正榜四十五名副榜九名既放榜錄文

十九首詩一首恭呈

御覽臣載拜手稽首颺言簡端竊以臣國家用人之難在于

得人之難設科賢路之一也一省鄉試天下之一也顧其初

皇上親加試定考官又前後自釐正文體至剔防諸弊靡一

不關

聖慮由是內而禮臣外而監臨諸臣下及襄事者悉給而考官始泣事且一切經費未放榜既放榜凡所以待考官士子將事諸臣者儀數特榮迨舉人赴禮部諸臣且竣事矣又復上塵

宸衷

欽定磨勘蓋迄乎是省磨勘畢而統計上下成勞已閱三時夫乃得此一榜之人顧此一榜之人莫必其皆賢也莫必其皆成進士而皆登仕路也其登仕路而賢可任小賢可任大則固將以收得人之效其任小而驟蹶也則人一費矣其任大而終愆也則人又一費矣必其任大而可久之且至數十年夫乃是科上下所萃注之心力祇于斯人收全效焉然必斯人之大賢而實有裨于國計民生者乃足以當之則槩較

一榜所得能必其有乎能必其多乎則甚矣得人之難也儻其閒眾不必賢而一旦不肖焉不必其大也第令他日其鄉里有追咎某科之所得者則考官卽負疚靡涯何可塞責臣於校閱據臣識見所能及互相審辨而特以人情習常漫詡爲三年一舉之榮名是以敬謹質言其本末廣西在京師南七千四百里外三江五嶺盤互鬱紆臣出京師見畿縣渴雨得霑足耕犁歡然咸知感

皇上

大雩格

天以生萬民由是黍梁瓜蔬木棉稻苗接河南境青青彌望渡江而武昌而岳州而長沙繡塍沃衍相錯于連峯晴翠閒稔稻高及人身香風溢吹徧野男婦收割驛程景物之可樂

日戴

君恩及過衡岳之陽零陵江山之勝迤邐入廣西匯秀乃不可名狀碧湘婉流東北崇巒大嶺夾趨西南行長松百里之陰豁然沃野中闢而光天清氣盎然和粹其間臣意山川完固若斯自漢以來所產人物猶未埒他省我國家文教涵濡百年其厚所積者固且歲以發矣

聖德誕敷賁及草木土姓皆興仁讓諸蠻亦入膠庠則夫挺生人傑翊我

皇猷揚越之邊諸山川之靈其濟濟然以次獻秀于太平極盛之候也哉維時官斯土者兵部尚書兼都察院右都御史總督廣東廣西等處地方軍務兼理糧餉臣李侍堯提督廣西全省水陸軍務統轄各路漢土官兵總兵官臣史宏蘊鎮

守廣西左江等處地方管轄漢土官兵總兵官臣段起賢鎮

守廣西右江等處地方總兵官臣王運洪廣西分巡右江道

臣祿寶桂林府知府臣布勒亨例得備書署 曰講起居注

官翰林院編修加一級臣錢載謹序

江南鄉試錄後序

乾隆三十年六月禮臣疏請江南考官

欽命工部右侍郎臣宗文為正臣載為之副臣材質庸下叨

列詞林蒙

皇上加恩優渥充 講官職右史備宮僚屢預校文今年春

聖駕南巡二月奉

行在

旨擢學士榮幸已極茲復荷

天獎畀以大省司衡感激益切宗文偕臣馳驛入闈率十八
房同考官祇慎將事八月十三日外簾進卷九月十一日放
榜舉江蘇六十有九人安徽四十有五人副榜者共二十有
二人錄文恭呈

御覽臣循例謹序于後伏念 國家設官分職內外大小皆
惟正人科目以取人所憑者黏名易書之文故欲其人之自
範于正必先其文之不詭于正而後庶幾其什之一也雖
然若司衡者之學識止于是則失之其文即失之其人矣臣
齋沐渡江禱於江之神上惟

祖

宗朝以來培養深厚

聖天子文德隆盛思賢若渴大江南北山川出雲必有端碩

之士應

昌運而以歲發軔者願神之默佑其愚不爽鑒別蓋臣實懼
不克以勝任洎閱卷宗文暨臣先分經以校同考官所薦各
合二三場詳定亦即互較第憑本房之薦固不敢輒以薦為
不足憑亦不敢故有盡搜其所落者亦有不盡搜其所落者
江以北之文多樸江以南之文多秀斯則山川之風氣然矣
樸者去其窒秀者去其浮樸而秀則惟望其人之質有文也
秀而樸則惟望其人之文有質也蓋就臣之所見則如是且
比歲

功令慎重磨勘臣閱卷時不敢徒以瞻顧磨勘條例為竟事
也盡力以用其所明猶恐不及臣惟知求此中有正人可以
供 國家器使者夜鐙青熒肅肅乎臨之其在上質之其在

旁仰惟

聖天子鴻文覃敷雅化周于四極山川百靈其必有以效職而呈才也臣臨序不勝悚惕之至日講起居注官翰林院侍讀學士加一級紀錄五次臣錢載謹序

江西鄉試錄序

乾隆三十九年甲午科鄉試禮部奏請江西考官

欽命臣載臣廣運往伏念臣載荷蒙

皇上天恩擢用兩典鄉試三充會試同考官茲復仰承

恩命撫心悚惕感激難名臣偕臣廣運馳驛至南昌屆期入

闈監臨則兵部侍郎兼都察院右副都御史巡撫江西等處

地方兼理軍務兼提督銜臣海成闈外提調則江西等處承

宣布政使司布政使臣李瀚闈外監試則江西等處提刑按

察使司按察使臣歐陽永禱闈內提調則江西通省督糧兼

巡南撫建地方兼管水利道臣靈泰闈內監試則江西通省

驛鹽分巡瑞袁臨兼管水利道臣李源內簾監試則江西分

巡廣饒九南兼管水利兵備道臣秦承恩內簾掌卷則建昌

府同知臣安洛德肅清內外恪共厥職於是進學臣曹文埴

所錄士局闈而三試之臣載臣廣運率十四房同考官臣程

化鵬臣邊學海臣鄒朝陽臣梁鳴岡臣汪志仁臣鄧廷輯臣

朱廷基臣李三聘臣張念淳臣米錦臣韓泗臣錢大章臣蘇

遇龍臣黃應超敬謹將事悉心校閱三場竝重已落之卷按

閱不敢不盡循例取中正榜者九十四名副榜者十八名選

錄其卷恭呈

御覽臣載例得颺言簡端竊惟

國家設科取士務在必得真才洪惟

世宗憲皇帝諭旨文章以清真雅正爲宗我

皇上特申諭旨令直省學臣鄉會考官非先輩大家之理法者置勿錄竝

欽定四書文以爲之程式江西昔所稱理學節義文章之鄉也匡廬之山彭蠡之水氣象清雄應時鍾毓蒙賴

聖天子作君作師久道化成士生其閒沐浴詩書禮樂之澤涵濡豐亨裕大之庥父以是教其子師以是教其弟太平之樂既無踰此日則人文之蔚興其在斯時惟是臣心有所知力有未逮體我

聖訓懷以

帝臨畢日之功夜或數起于四書文則取其理之醇者氣之

昌者既惟先正之是規而先無取其速化之術蓋俗學揣摩之習有所謂墨裁者流轉于人間而效尤之未能遂至于支離廓落顧其聲調諧協藻采斐然則必其苦志寒窗非誦讀之既深者不能作臣亦閒收之而不敢棄也二場詩格輒有佳句而篇或未純三場對策臣仰見皇上廣求遺書彙鈔四庫

親加甲乙

賜題宸什所以風示天下士子之讀書學古而問以前人之編纂書目竝仰體

聖人教養天下而每歲秋讞

欽恤刑典之至意而問以江西白鹿洞書院之教規問以江西古今之文派問以江西社倉之利弊問以鄉飲酒讀瀆禮

輔于刑之制則見其冒亦有書槩能數典且其中實有傑出之才數陳昭晰文氣充然不詭于正臣于是而益知大聖人九重宵旰仁漸義摩之風覃被于日遷善而不知為之者之至深且厚造物乃遞鍾遞毓以荅皇心以備器使斯固有其隱然而顯者矣臣載拜手稽首敬以是為

國家慶也維時恭膺職守者太子太傅內大臣文華殿大學士兼禮部尚書議政大臣仍管兩江總督統理河務臣高晉署理總督淮揚等處地方提督漕運海防軍務兼理糧餉臣嘉謨江西分巡吉南贛甯兵備道臣錢策鎮守江西南昌等處地方總兵官臣張兆璠鎮守江西南贛甯袁臨等處地方總兵官臣蔣萬欽署南昌府事撫州府知府臣許蔭楷例得

備書內閣學士兼禮部侍郎紀錄一次臣錢載謹序

揮石齋文集卷第七

秀水 錢載 坤一

序三

武會試錄序

欽惟我

皇上文德誕敷

聖武懋昭文武二柄兼施竝濟而作人之化歲以加隆乾隆
乙未秋九月武會試屆期部臣按典以請

上既命內大臣署鑲紅旗蒙古都統多羅誠郡王宏暢正白
旂漢軍都統范時綬署宗人府右宗人署正白旂蒙古都統
正藍旂護軍統領奉恩輔國公宗室崇尙正藍旂漢軍都統
邁拉遜爲監射官兵部尙書嵇璜左侍郎高樸周煌右侍郎

景福為校射官於教場分棚監校武舉人馬步箭弓刀石乃命臣載偕翰林院侍講臣金士松為主考策論官時則知武舉官兵部左侍郎周煌詳密綱紀內外簾各官恪供厥職臣謹與臣士松入簾發題暨同考策論官戶科給事中巡視中城監察御史臣戴第元吏部稽勳司員外郎臣張培禮部精膳司郎中臣陳其焜刑部江西司員外郎臣洪朴憑收掌試卷官計卷分房同矢公慎遴選外場雙好單好字號校以三場之詞義才識得如額者四十九名既撤棘錄前五名之文進呈

御覽臣惟武科考校

本朝整飭規條酌中而嚴肅歷久而振勵現行定制頭場試馬上箭豎立三把各離三十五步弓三力馬馳埒者二回射

六箭復馳射地毬者一回中三箭入二場二場先試步下箭把高五尺五寸寬二尺五寸遠三十步弓五力穀滿直衝把者中衝把根把旗者不中六箭中二箭者乃試弓刀石其弓刀石頭號十二力弓一百二十斤刀三百斤石二號十力弓一百斤刀二百五十斤石三號八力弓八十斤刀二百斤石弓必彎圓刀必舞花石必離地到椿其所試皆三號者不入三場一二頭二號者亦入三場其弓力有能十三力至十八力者聽三場試孫吳司馬書之題論一篇主考官發策問一通校其文理通順合之外場馬步箭弓刀石好字號之數多者方予中式于是出眾者固由是蜚聲而負奇者亦于焉奮翮蓋我國家將帥之任滿洲世臣軼倫超羣人傑輩出古之取為卿材即將材也若夫光嶽所鍾直省所在千百之什

一其堪爪牙堪腹心者

祖

宗朝以來篤生踵起實有其人今者

聖天子久道化成栽培鼓舞作鄭重于其漸進遞升之初斯則
苞桑鞏固宅中又外本計之攸賴者矣臣幸逢盛際得預
求賢見夫英挺之姿曉習兵家灼然應時以獻爰拜手稽首
以述以備武科之掌故云內閣學士兼禮部侍郎紀錄一次
臣錢載謹序

江西鄉試錄序

欽惟我

皇上至仁至孝健行厚載統壹中外躋堂稱觥之列辟羣臣
億兆民咸俟乾隆四十五年龍集庚子

萬壽七旬大慶之辰上祝

鴻禧

聖心謙受豫

詔使勿有請迺

賜免天下田租一年修

翠華春巡之典

親視河海行慶施惠于東南

特開恩科登進天下賢才前一年己亥鄉試屆期禮臣以江

西請

欽命臣載偕臣虎拜典其事臣載扈

蹕避暑山莊謝

恩蒙

召見便殿

垂詢諄摯翼日還京馳驛抵南昌入闈進學政臣汪永錫如額所錄士三試之時則巡撫臣郝碩

陞見入京護理江西巡撫印務布政使司布政使臣秦雄飛為監臨闈外提調署布政使司印務按察使司按察使臣瑞齡闈外監試署按察使司按察使印務鹽法兼巡瑞袁臨道

臣李封闈內提調分巡吉南贛甯兵備道臣孫廷槐闈內監試護理通省督糧兼巡南撫建地方兼管水利道印務饒州

府知府臣萬鍾傑內簾監試南康府知府臣陳洛書內簾掌卷吉安府通判臣田純整肅綱條各共厥職臣載臣虎拜率

同考官定南廳臣朱昕知縣臣鄭樞臣郝適臣張龍占臣馮煊臣史在魯臣黃維綱臣郭廷槐臣顏文楷臣米錦臣高蟠

臣劉嘉賓臣鄭九敘臣冷泮林恪循新例分房分卷一堂披閱得士如額既揭曉錄文恭呈

御覽臣敬謹颺言簡端竊惟衡文取士之道韓愈始竝發公明之義夫有司而至公職之可盡者有司而至明非僅職之

可盡矣然苟不明則雖公何益哉仰惟皇上振興文教

親校四庫全書凡以風勵臣工豈惟衡文是備政治之興烝烝而曰上舉肇乎此也臣蒙

恩總閱四庫之書亦冀銖積寸累工夫濡染卷軸庶有一知半解之得江西理學文章功名忠孝節義之鄉也沉乎深受

聖朝教養之恩蓋自其高曾以來矣我皇上樂育天下士子教誨深切豈惟江西為然則其遵道遵

道

路奮志而發蹟蓋報禮然也臣甲午科蒙

恩典江西試見其文章具有梗槩此非江山之風氣使然也我

皇上嘉惠士林

欽定唐宋文醇詩醇四書文三書皆文章之淵源機杼關鍵本根大道之所該洽約六經之旨以成文具在是已維習俗之還淳久而乃化當不獨江西今歲恭遇

恩科多士之鼓舞其氣象加盛於疇昔充乎沛然渾灝流轉之文往往而可得信乎江山風氣之昌維南壽嶽之東來至于德安敷淺原起而爲廬阜以翕闡乎大江彭蠡之交其間之秀靈仰被

大聖人盛德作人之雅化誠有如械樸叢生之盛者廣哉熙

熙乎如歌大雅矣周之文王壽躋百歲積累之久賢才變化鼓舞乃如雲漢之自然而爲章于天我

皇上緝熙敬止純亦不已小心翼翼綱紀萬方用是克生濟濟之多士于以備疏附後先奔走禦侮之助皆由

盛德之感人者深積有歲年惟其綱紀之無乎不勤而後振作之無乎不應且惟其作之以豈弟之德天壤之內莫不自得其性如鳶之飛如魚之躍上下各得其所不知其所以然而然者夫盛德必享於祿壽猶黃流必注于玉瓚德在是福亦在是蓋自然受福而必然受福也此又詩人榛楛之義大矣哉盛德之感人觀于今而益信于古也臣勉竭愚蒙敬

謹將事有以知天下十五闡同風之盛所以爲

昌辰賓興之慶者雖大雅之詩人有所不能形者哉維時恭

鷹職守者兵部尚書兼都察院右副都御史總督江南江西
兼管河務世襲騎都尉臣薩載兵部尚書兼都察院右副都
御史總督淮揚等處地方提督漕運海防軍務兼理糧餉臣
鄂寶江西分巡廣饒九南兵備道兼管九江關兼理窯廠事
臣額爾登布鎮守江西南昌等處地方總兵官臣張兆璠鎮
守江西南贛吉甯袁臨等處地方總兵官臣吳掄元署南昌
府事九江府知府臣覺羅伍拉納例得備書內閣學士兼禮
部侍郎教習庶吉士臣錢載謹序

江南鄉試錄序

欽惟我

皇上聖德日新健行厚載執中建極萬福來同乾隆四十有
五年龍集庚子恭遇

七旬萬壽大慶元日

恩詔覃敷臣民歡洽

翠華南幸江國增春前是

荷蒙賜天下田租開科取士今歲正科禮臣以江南鄉試屆期請

恩命臣載偕臣戴均元為正副考官臣載春正奉

命秦蜀以

萬壽盛典行告祭禮于嶽瀆諸處甫竣趨覲 山莊

溫語有加翼日膺

命歲在己亥臣載為江西正考官歲在乙酉臣載為江南副

考官疊奉

恩光攄忱悚切星馳抵江甯時則總督臣薩載而監臨安徽

巡撫臣閔鶚元提調鹽法道臣伍拉納監試常鎮通道臣孫
栝整肅場規暨內簾監試池州府同知臣王惟一收掌直隸
州州判借補濬山縣縣丞臣向大齡恪共厥職爰進江蘇學
政臣彭元瑞安徽學政臣戴第元所錄士如額者局闈三試
之臣偕均元謹率同考官甯國府同知臣甘樹崑山縣知縣
臣費志學陽湖縣知縣臣張希賢儀徵縣知縣臣王學濂嘉
定縣知縣臣姚學甲祁門縣知縣臣沈炳涇縣知縣臣劉立
詮建德縣知縣臣王昌霖巢縣知縣臣史必大全椒縣知縣
臣袁烜來安縣知縣臣胡翠仁天長縣知縣臣萬選宜興縣
知縣臣袁知荆溪縣知縣臣馬世觀靖江縣知縣臣徐玉衡
溧陽縣知縣臣郭占選鹽城縣知縣臣康杰江都縣知縣臣
孫銘彝凡十八房循例分卷同堂披閱三場竝重無敢不力

既得士正榜一百一十四人副榜二十二人如額臣謹循例
錄文恭呈

御覽竊惟大江南北洵人文淵藪也江爲一瀆江以北濟河
淮三瀆焉白河瀆淮瀆合注于江南之海而山東大清河亦
入河大清河濟也水之所注隨山之脈以趨羣山之脈趨東
南則秀靈之氣必隨之鍾而洩則今大江南北之人文必有
其超軼曩古者然其秀而升者其有所裨益于國家則可
以爲人文其無所裨益于國家則不足以當人文臣又伏
思人文槩辭也如春林然萬萼揚蕤如錦肆然千純絢采若
夫千人之英萬人之傑爲國風雨爲國棟梁則鳳凰麒麟之
謂矣夫豈僅以人文當之今江蘇安徽分兩巡撫而總督實
駐江甯古金陵也臣蒙

恩以試事一至廣西兩至江西一至山東今年奉使秦蜀名山大川之徧歷復渡大江然後知今日之金陵不可僅如昔人以佳麗目之也自孫吳據有建業司馬劉蕭陳李一隅半壁明祖不再傳而已稱爲舊京江山風氣之昌蓋有待也我朝揆文奮武不冒萬寓

聖祖仁皇帝鑾輅六幸江甯澤流萬禩我皇上法

祖勤民

翠華四幸江甯矣敷天同慶

皇帝七旬萬壽亙古稀有福備慶長

大聖人大一統之規模蓋于斯而極盛則夫嶽靈修貢川祇效珍且如出雲降雨應時而勃興乘時而利見其足以爲人

文與夫不僅當之以人文者烝爲國華升爲國寶又豈惟大江南北爲宜然而況大江南北瀆靈匯秀遲之又久而必發符

昌運以瑞

聖萃河嶽爲國良則今其時也夫豈偶然哉臣之校閱按理法慎去取雖祇揣心聲于黏名易書以知其濯磨振奮以求上爲國家得人之慶而寸忱所結實惟天地篤生之賢良出爲時用則鳳凰麒麟之在郊極其在斯時矣此固不敢有欺于屋漏神明而誠惶誠恐誠懼誠忭以上陳于黼座之前以稍效其一得之愚者維時官茲土者江甯將軍

兼管鎮江將軍輔國公宗室臣嵩椿總漕督臣鄂寶總河督臣陳輝祖署江蘇巡撫總督臣薩載兩淮鹽政臣伊齡阿浙

江巡撫兼管兩浙鹽政臣李質穎江甯副都統臣武德里鎮
江副都統昭武侯臣圖桑阿松江提督臣李奉堯蘇松總兵
官臣藍元枚狼山總兵官臣葉浩壽春總兵官臣閔正祥江
甯布政使臣劉墀江甯織造兼管龍江西新關務臣穆騰額
蘇州織造兼管滄墅關務臣全德淮宿關務臣徵瑞蘇州布
政使臣瑞齡安徽布政使臣福川江蘇按察使臣塔琦安徽
按察使臣袁鑿江安督糧道臣錢金殿蘇松督糧道臣章攀
桂松太兵備道臣盛保安徽池甯太廣道臣福保廬鳳穎道
臣基厚河庫道臣何裕成淮揚道臣荆棠淮徐海道臣韓鏐
兩淮鹽運使臣倉聖裔江甯府知府臣李士珠例得備書禮
部左侍郎紀錄一次臣錢載謹序

擗石齋文集卷第七終

擗石齋文集卷第八

秀水 錢載 坤一

序四

金先生蔗餘集序

先生之學學於宋元之儒者也說諸心修諸身不事口耳之
習先生之詩由唐入宋者也獨居寡務陶冶性靈不涉名流
之聲氣雍正癸卯舉於鄉再上公車泊然自守少多疾通醫
藉供潔白之養積書數萬卷教其子砥行立名一門之內藹
藹如矣南湖之東買耕舍一區種桑百本槿籬四周日俯仰
其中自幸生長太平晚而衣食纔足靜觀萬物之理詠歌堯
舜之風人有知先生者接之始終靡閒其不知先生者亦不
求其知之也載承先子命幼及于門先生懇懇款款教以勉

承先緒而家君學超又嘗從載授讀既客京師七年歸登留
餘之堂而先生病矣學超司鐸昌化今年春病少差載請得
詩集編次焉先生歆然曰吾本志不在是是烏足以言詩哉
蓋平生所作不多存今所存者僅一百五十四首謹釐為四
卷曰蔗餘集以俟夫後之讀之者即不知先生亦可以知其
所學之大凡矣乾隆乙亥七月朔門人錢載述

查天池詩集序

雍正乙巳交于同郡朱子霖齋陳丈書綠祝子宣臣始時聞
稱海甯查君天池能詩蓋朱陳祝之友善于查也素矣乾隆
辛酉壬戌讀書德清餘不溪上嘗遇君弟子又知君讀書臨
平山中從而游者日益盛既來京師久歲癸酉查君令子蒼
林以貢入成均相見詢君起居又三年蒼林奉君近詩兩集

述君言來屬序載惟君之以詩名者三十餘年矣雖老困場

屋而教授生徒恬然具山水之樂喻道于文益流真氣矧仰

承家學查氏代有詩人人有詩集君之所作又不僅其前人

之緒餘也載何知乃以序其詩蒼林試于京兆不得舉而歸

歸而丁母夫人之憂逾歲而君之悼亡詩又至矣載既無所

以復君南望輒為之踟躕且回憶昔時稱君詩者惟祝子以

舍人官京師可曰相見朱子陳丈已先後歿不可見矣而今

載乃始遠與君定交楮墨之間猶未獲觀全集將欲從祝子

共歎賞所作而君固未克聞之也然則人生境遇一切合離

久暫之迹洵有天焉于此亦可觀已君方以讀以耕以俟晚

成他日未知當與君相見何所行請篇帙之全而一一論次
之乾隆丁丑八月九日題于藜光橋之寓舍

紀心齋楚游集序

雍正辛亥詩翁南潯茅渠詹遠游歸偕載倡酬禾中比十年所嘗爲道其里紀子心齋工詩載心嚮往之而未之見也後相遇都下又未見其詩及同登進士同改庶吉士始嘗見其館課及同散館乃數見其書懷遣興之作時方讀杜所作特老蒼心齋性伉爽而與人也樂易其于詩往往用古誼據今情所持論不必宋以後既奉太夫人諱歸貧不克葬謀于所親入杭州泮錢塘踰玉山折趨景德鎮抵南昌汎鄱陽九江至漢口武昌出安慶循大江而下越日百二十得詩一卷既還朝改官御史暇復刪存之俾載以序則見其古體寥寥獨造非恆蹊近體五言高可企河嶽英靈中興閒氣諸家嗚呼勞者之歌半在中年所不忍忘詎關游歷今茅翁以廣文退

休且八十有八歲矣心齋盍錄寄之以一發其壯盛之離愁乎蓋卷中江山名勝皆茅翁辛亥以前所登涉也乾隆壬午春正書于丞相衙衙之寓屋

海昌祝氏重修宗譜序

海甯縣今升州州之祝氏在元時其三五承事自栝蒼來遷至十一世起家進士爲虛齋先生先生我錢氏之所懷德不忘者也我海鹽之錢起家進士爲臨江太守琦實偕吳南溪游先生之門載修錢氏族譜及狀誌碑傳則首錄先生明故處士錢公墓誌銘賜進士出身奉訓大夫工部員外郎致仕海甯祝某撰者處士臨江考也我先德之見于文實始先生浙西稱園花鎮四姓曰查祝許董龍山之祝茶磨山之許其風氣樸厚夙孚他姓臨江先太常叔也臨江既學于先生而

其子師臨江曾孫文學以默又爲之聳太常爲許雲村先生道義交以女妻其子侍御聞造雲村致給諫而歸學于姚江王氏其同學有若夾山董蘿石給諫之墓所謂大還岡者祝氏龍山祖墓相近也嘗登龍山登祝氏濟美之堂獨未見葆光居之牡丹查初白先生所賦詩者然于兩姓先人切切嚮往焉蓋自其少日有不忘者矣今乃以三五承事十九世孫咸章重修宗譜序之屬讀其舊序攷其譜法仰其世德猶髯髯臨江之摳衣升堂請業請益于先生然則以錢之後而爲祝之譜序也其宜亦其幸也先生之耳孫孝廉開美先曾祖雍頌孝廉同學于戢山劉氏少司空惺存季女先高叔祖文學君政之元配先祖兄弟濟美堂羣從康熙間往來中表內閣典籍宣臣載相友善者四十年學使芷塘又同官翰林今

序學使來請也而載適修臨江之譜先生講道海上之州三百年以來不惟祝氏其流風之隱然有以被及者蓋可得而思然則譜始于先生而一修再修蕃衍其先緒至今嗚呼君子之澤可以觀矣雍正辛亥訪茶磨山讀雲村先生墓則家則于其宗祠之碑乾隆乙丑嘗讀先生嘉議堂之集夫祖澤未有不艱難者而敬宗收族凡所以譜之心未有不原于類此者他日歸敝廬于永安湖敬拜先生之祠而重登龍山且重訪茶磨山焉乾隆四十三年閏六月朔

屠氏重修族譜序

族譜孝弟之道修譜孝弟之事攷於史古人重譜學於是族譜之撰厥後更有家譜戴記大傳云尊祖故敬宗敬宗故收族儀禮傳謂大宗者收族者也則夫族譜蓋收族之尤切

者惟親親故尊祖而敬宗而收族親親人道之始蘇明允譜
蘇氏之譜立法甚嚴夫譜法不可不嚴也其言曰吾之所以
相視如塗人者其初兄弟也兄弟其初一人之身也一人之
身分而至於塗人此吾譜之所以作也其意曰分而至於塗
人者執也幸其未至於塗人使之無至於忽忘焉可也觀吾
之譜者孝弟之心可以油然而生矣嗚呼孝弟親親之至此非
獨蘇氏譜宜云爾也然載猶以爲何忍言至如塗人哉惟其
非塗人而已至於如塗人也相收亟矣此則譜之外之所事
者與嗚呼人人親親而尊祖敬宗而收族而天下大治矣嘉
興屠氏之譜康僖公所作王文恪公序之曰原其同則不迷
於所出辨其異則不混於所施二語足以見其譜法之善今
其裔孫霑

聖化守家法承屢修後重修其譜則孝弟之事也載嘗見康
僖公之墨蹟未嘗以書名而其書如顏平原然後歎先哲之
所以傳世悠遠詩書科第蕃衍有非淺識所能窺其際者嘉
興在明正統壬戌進士如文懿呂公襄毅項公同榜同年也
越六科成化己丑公登進士今郡城東角里街屠康僖公之
祠巋然獨存行路者指稱屠家祠堂又呼爲三牌樓載少時
曾入祠之外扉觀所立碑以敬仰焉公籍平湖今子孫居郡
中者不少而凡當日所立祭田歷久無所闕失則公之遺其
後人者可以思已重修諸君來請序謹寫其心之所僅知者

宣南篋存彙序

承先人之澤爲舉子業未能探極本原少年氣盛徒以詩酒
遣貧不殖而落幸進于有司其果何所挾持邪俛仰時趨無

可自蓋今者以筐篋之猶存也連而錄之誠欲書其座主總裁本房舉主之姓氏官職藏于家志不忘而固無當于外人既官翰林凡夫當職之作非若歐陽公之可以不得專一自謙而南豐先生之可以爲中書舍人之所盡觀也顧其閒實有國家之典禮當職甚少然盡芟之則莫由省覽乃如清真石帚少輒好之最後見錢唐厲徵君之筆而爽然于年力之不可追而及夫得者自得能者自能凡事類然況斯文乎所居宣武門南編次以題榆陰在庭而東隅之失多矣豈其歲晚之不能與蓋少日之不知也非少日之不知而壯日之不學也悔何及哉悔何及哉乾隆甲午夏秀水錢載自序年六十有七矣後此者其亦入之無可取也僅不棄之

蘅石齋文集卷第八

終

蘅石齋文集卷第九

秀水 錢載 坤一

序五

座師 予告禮部侍郎鄒公八十壽序

乾隆乙酉六月二十一日爲

誥授資政大夫少宗伯小山鄒先生八秩誕辰今年九月門下士官于朝者豫謀所以壽而先生書適至命載曰僕媿薄德無益于世蒙

聖主恩賜歸田里六年以來修譜修祠修塋修社聊且畢家事矣天棄樗櫟明年已八十又何足道惟是君賜之閒遭逢景運宜有以紀之子齒長其爲之辭載奉書以諗于同門生僉曰先生之躋大耋而享

君賜之間是即天之所以徵先生之德矣又曰先生少貧偕

誥封夫人憚夫人楮柱舊門實勝勞瘁登第以雍正丁未晚

遇而紆徐不驟崇列卿貳初居詞垣

天子龍潛即鑒知其樸學兼繪事 睿篇及之既歷諫官有

聲蓋古直之道自諸生而已然載等未第先生爲僉都御史

嘗值五更籠鐙入朝僉從肅然望而知爲鄒公之輿也王申

副會試總裁出門下歲之壽日嘗以菊黃候舉觴聯句賦詩

先生視黔學六年所造士之官于朝者咸在座經訓紛綸恍

然觀前哲之典型如是已卯春南歸送先生出廣渠門過古

寺持畫梅一贈老僧曰十年之諾不可負今南歸矣蓋先生

無畸行無誕節神明于六藝之奧以從容乎中庸之塗顧猶

自視歆然若此于以徵先生之德所以承道鄉之遺緒者遠

且長也載曰先生去道鄉先生二十世順治己丑狀元內翰

林祕書院修撰海嶽先生爲先生祖載舊藏有前明提學副

使愚谷泉州太守木石兩墨蹟鄒氏之文采風流代聞于江

左至先生與兄學士慎齋先生同官翰苑乃更熾昌近讀族

譜所作諸小傳藹然惻然孝弟之心溢于楮表先生之所以

尺寸兢守誥教其後昆者愈返本而愈抑下且先生固自言

之矣戊寅冬請告

天子賜詩寵行載賀于庭先生曰某平生譬如諺所云秀才

三等文章也雖然大不易庇先人遺澤遭逢

聖主恩遇幸遂始終某之觀于世也久矣先生既歸道鄉祠

屋在西神山麓暇則攜子孝廉君徜徉泉石課長孫抱幼孫

二

華石齋文集卷九

里之英俊請業者輒敦勉不倦辛巳冬恭屆
慈寧七旬萬壽大慶來京祝

釐

詔圖形于致仕九老之圖 賜杖趨朝極儒臣之榮遇壬午

春 御舟南幸先生扶杖以迎于水次明年春

上四舉南巡先生適年八十長洲沈大宗伯歸愚先生年九十有二于先生為小門生家大司寇香樹先生年同八十于先生為館閣前輩皆相衿契二百里間三老臣皆圖形九老身康彊而子孫逢吉扶 賜杖以恭迓 龍旌于玉梅金柳之苑盛矣哉

聖世人瑞非甚盛德克荷栽培其可以易而致此也乎載辭

觀縷門下士俱欣然樂俾載謹書之以復俟孝廉君張錦于堂以介我師暨夫人之侑雙卮焉

陳汝定先生七十壽序

載未第里居時聞今相國榕門先生為政于吳閩然以道自任而始稔粵西人物之在陳氏也既官翰林于相國為後輩賢孫松山又同官而始稔陳氏之有家風也歲己卯

天子命載典粵西鄉試得陳生鍾琛則相國季弟汝定先生

之子詢之同榜生盛稱其尊甫行誼而始稔先生陳氏之孝

弟長者也臨桂之西鄉奇峯連連三十餘里一峯獨橫曰橫

山又曰獅山陳氏百家廬其下先光祿公樂善循理有隱德

丈夫子三長封奉政大夫九十歲時蒙

聖恩賜額友恭篤慶者也次相國次先生自其少時隨相國

受書于奉政以光祿公劉太夫人家計日拮据乃獨力佐摒
 擋躬習農圃業織齋治生謂不惟抒堂上心使兩昆謝近務
 紛營得專致于詩禮以亢我宗以啟我後此則先生之所行
 至于今固明效大驗者矣相國官江南光祿公劉太夫人先
 後就養考終靈輻之歸先生獨跣足萬里及安窀窆兩昆一
 手倚之相國歷秉節鉞廨內之務先生又嘗獨力佐之使相
 國得盡心于政事而凡所欲振其家者宗祠之立祭田之置
 儀數與規條畢備也所欲濟其鄉者社倉之設橋梁達路之
 修村東蓄水大堰之重建早潦是資而往來是達也蓋惟光
 祿公隱德平昔教言實挈其端緒而相國為善承之顧不得
 先生之力則三數十年以來成就之而整頓之者豈必其盡
 釐然若斯也哉然則弟于兄者固即孝于親也而人之靳進

於學問者亦從可識已方先生六十歲壽之者美其克庇後
 而鍾琛舉于鄉今鍾琛官畿縣二年矣而先生今年政七
 十鍾琛乞載言以為壽夫載則安能壽先生哉先生之所以
 壽者惟其有先生之德則鍾琛之所以壽先生者必其有鍾
 琛之德鍾琛之為政于撫甯也先生教之矣愛其民忠於國
 見利必思其義改過必遷于善果其夙夜動靜一皆以先生
 之心為心則益亢其宗者益啟其後而可以為先生壽矣則
 今日粵西陳氏之風其亦既推充之而見于行事乎則鍾琛
 其率兩弟以奉先生觴乎是為序

王惺齋六十壽序

載退朝發山東書而笑曰王尙珏未之識也余之離鄉也二
 十七年矣甲戌請假歸未嘗見惺齋于里也余家之東又數

十家明殉節隨州徐公祠屋君十五六歲初爲諸生隨其妻兄讀書于祠屋今尙珩之書乞言以爲君壽且致其弟尙繩補縣學生之文余是以喜惺齋之六十歲而其子又皆爲諸生也方其讀書祠屋也一日過其妻兄見君讀韓集後漢三賢贊此雍正幾年也乾隆辛未君會試中式朝考

上欽命題後漢三賢賦余時竊以爲遇豈其天邪天豈其將厚之邪而君之卷不中選余是以嘗怨惺齋也成進士矣得縣福建數月而罷歸自其新坊移家郡城不戒于火乃挈室以復至福建爲書院院長而近又于山東使其久于其縣也其所自見豈僅止此而止此也雖然友教四方抗顏而爲人師今襄平徐公績實撫山東其下第授經都下之弟子也延以主灤源書院然則君之教于人而成于人者蓋可思以視

余之竊祿于朝碌碌無所自見惺齋其又何以望余也哉然而尙珩過矣尊甫先生學震川歸氏以爲文者震川歸氏之爲人父母壽也皆以古者於禮非如世俗之所以壽而遂以爲其人之父母壽則今者余其震川歸氏乎其不震川歸氏乎往時讀書新坊周家見新坊闐闐雜遝君起新坊闐闐中余之不見新坊四十餘年矣其水舟所嘗行也其稻畦桑壟與夫周家之前院辛夷後院牡丹皆嘗見余十四五歲也第不知惺齋其時八九歲讀書某塾也而今乃與余皆白頭以稱翁也乎又嘗聞惺齋之登第而歸新坊聯巨舫如堂朝服進酒拜以壽其太公太母金鼓笙笛沸水上兩崖走觀者皆以爲笑則今者尙珩兄弟其以余之文當君家水上之金鼓笙笛則尊甫先生之笑且有甚于兩崖之走觀者也是爲序

吉母錢太宜人八十壽序

通政司副使吉君奉賢母錢太宜人于京邸今歲庚寅八十歲矣耳聰目明日常猶時時走省家務課孫背誦猶能作小楷書二月初九日誕辰同朝稱觴屬載爲文以壽載年家子固以母事太宜人況其同姓大江以南浙東西之錢皆系出吳越則今日之上壽而親切言之者宜莫如載也蓋世之賢母如太宜人可謂難矣隱君御天先生居丹陽與遺老郭世通湯寅結詩社嗜古多藏法書名畫客至彝鼎滿堂而以小學孝經四子書詩書易禮春秋授其女是卽爲太宜人晚乃教授里中而封公煥文吉先生從之游隱君器吉生遂以女妻之吉氏雖舊門而中落封公與伯兄雖織齋治生而食指繇衣食亦才足然太宜人之歸而事其舅姑也視力所能無

不致者舅將歿遺言後其弟以仲子是卽爲封公而其弟之家則貧甚于是生養死葬又幾瘁矣封公故治生于外伯仲兩家故同爨而實倚太宜人一身操作于內而以食之也吉家之得食而無乏者皆倚太宜人操作于內而以衣之也此非副使之爲載言之載房師前侍御今吏部郎睦公爲載言之也睦與吉同縣締昏姻知太宜人之艱勞也稔蓋四十餘年所載嘗轉以詢副使色悽然而不能答諸口也副使兄弟方就學無以延師則去師其族祖晨赴而暮歸則太宜人自教之授之文義一不如法則扃戶而予夏楚不聽勸止也既長詩書易禮春秋皆親授之以是三子皆通知經義拔萃士林長夢賚副榜教諭次夢熊進士副使次夢蘭進士改庶吉士前年副

使之子士璜又舉京兆今孫七人半列鬢序曾孫七人皆駸駸嚮學然後知隱君當日之授其女也蓋天之將以興吉氏也夫爲善者其家必興而天之欲興其家也則必使賢女子以佐之其事具在詩篇及史傳今觀于太宜人之于吉氏而吉氏之先德從可思已雖然載因是爲太宜人告副使也朝典以夢賚

覃恩推其親封孺人以夢熊晉封宜人明年恭遇

慈寧聖母八旬萬壽大慶之年

天子錫類宏敷行且膺加

寵命然此太宜人所自致而不足以盡副使兄弟之孝太宜人不能御紈綺先公之歿至今素服則今日設錦帨舞采衣而固不足于所以歡副使侍

皇子講讀亦既有年則本母氏之教裨益且達于上而猶不足于所以養蓋必深體太宜人之力其貧而鮮侔晨葩潔如白華然後可以養蓋必深體太宜人之力其貧以食人衣人而衣人食人之不徒行于其家然後可以報母氏之恩也與載豈特錢氏子爲太宜人侑觴而饗饗及是哉吉氏子孫他日其有不徒知之者已

從嫂沈孺人六十序

從子策再拜請曰我母今年六十矣生日爲九月六日我父沒以乾隆辛酉四十有四歲秋試得疾也十有四年來策與弟慤賴母而存外祖沈翁沒以康熙庚子十二月我母二十有三歲歸我父越三年而外祖沒也外祖母曹孺人生一女卽我母沈翁晚而未有子己亥婢張甫舉子而翁以庚子沒

舅名同生既娶矣三十有二歲無子而亡我母于母家蓋始終瘁心于是言未既惻惻不能聲嗚呼載知之矣此從嫂之孝之善全其隱曲者沈氏自少保繼山公四傳爲靜若翁代艱于子靜若翁既遺二齡孤而其母張又遣去矣曹孺人治家素嚴而法卽遇子女不少假顏色嫂故常依母家以居體翁志扶持弱弟以上得母孺人歡意良苦而又孰料弟之無子蚤世也策乎天下事之不能以心力遂者類有然矣然而其賢其明故自不可以沒今策將乞言爲壽而陳及之是卽策之知所以孝者已我家自太常公侍御公在明以直諫聞與少保公建言後先輝映嫂少保五世女孫策慈侍御五世孫策乎慈乎歸而求于家令緒猶傳宜若何其負荷載不能以壽嫂序其事俾策慈讀之怍怍于懷是卽嫂之自克而

遺其後者已謹序

稗石齋文集卷第九

終

蕲石齋文集卷第十

秀水 錢載 坤一

記一

黃梅花圖記

丁君易東送其子維垣應京兆試語之曰吾家黃梅花故事
 得乞今代山水鉅公復圖之其亦可也於是丁子至京乞圖
 於李穀齋憲副他日以屬載題後而具告焉去嘉善縣治三
 十餘里有湖曰沈香宋之南丁氏自汴京來世居湖濱理宗
 時祖五三翁手植黃梅一株于庭閱元倪雲林楊廉夫皆有
 詩及明而董文敏始為之圖陳徵君又為之記蓋五百年所
 三榦屹然入本朝康熙閒猶寒英燦發也易東祖豫庵文
 學嘗咏以七言十二首見香湖草堂集中不知其摧殘何歲

株朽無存而香光之蹟亦已失貯久矣五三翁八傳而爲清
惠公清惠之孫卽豫庵文學豫庵曾祖贈尙書號懷梅高祖
贈尙書號梅隱斯慶斯傳護培累葉然則黃梅固丁氏之嘉
樹今雖不可復見而追圖髣髴庶幾無忘先澤之意哉夫郡
有五百年物其亦不可以弗識也且丁氏蓋卽所居而補植
焉俾如雲林廉夫者一再咏歌之又豈特斯圖之足觀已邪
湖之寬逾三十頃四岸無山秋時彌望蘆葦李公固未嘗扁
舟過也圖中作瓦屋數楹三榦者磊砢臥階東屋前後長松
離立帶以巒阜則其意匠正未知于香光舊本爲何如矣

王氏宗祠記

吳江王氏之先諱壽者元末自桐鄉來居縣西之梅里生良
輔良輔生彥激彥激生守仁守仁生宗吉字樂善遷縣中今

王氏子孫所稱樂善公者也蓋王氏之大實自樂善始樂善
生子四月湖賢中丞哲芳洲明僉事敵今則惟僉事之支爲
蕃中丞事在明史宏治庚戌進士以御史巡按福建廣東江
西以僉都御史巡撫江西其沒之久也官立祠于縣後以公
弟芳洲之曾孫萬厯癸未進士御史贈光祿少卿有功耐焉
鼎革祠廢矣先是嘉靖甲子中丞嗣子度爲公作廟於正寢
之東則同縣周恭肅公爲撰王氏家廟碑謂今制品官得立
家廟祭其高曾祖禰並稱禮有始爵之文別子與初爲大夫
者宜以爲子孫世祀也歲久家廟亦廢矣僉事衛指揮僉事
也僉事之孫太學生訪字培槐自縣遷城東十里之同里鎮
至于今子孫五支農耕士讀霑被
聖朝化澤百有餘年以來冠昏伏臘家風僅而不墜于是本

其先有祠有廟之遺意卽同里率錢建宗祠以敦祭禮乃追祀其樂善公乃復祀其中丞公乃增祀其僉事公乃復祔其光祿公一堂三楹不侈而恪其事在乾隆己巳又二十年所而以刻石來請載惟王氏之大實始于樂善封君則今之由中丞初爲大夫而推孝思之永也同里之蕃皆祖其僉事則今之由始遷同里而推別子之義也而中丞暨光祿則固修舉其舊儀嗚呼王氏同里之子孫其善行禮者哉夫大姓望族其子孫而賢而通知禮意以安處其鄉其究也足以上裨朝廷風教矧今王氏同里之子孫已有其登第而仕于朝者乎則今而後以孝以友以保其世祀雖以仰承來居梅里之初志也可矣乃爲之書

陶氏洛山墓田記

秀水北有金橋縣治北二十五里有水曰雁蕩宋之南渡扈蹕而來者有陶氏家于金橋元巴延兵南下德祐詔勤王陶氏有菊隱者散家財集鄉勇以拒戰于橋下其潰也室廬盡焚乃避于雁蕩宋亡結村屋曰忠孝堂巴延物色之乃遷于杭州之洛山其地兩山相對茗水西來橫貫而東外祖家蘇姓居其閒乃姓蘇而依其居挈其子君疇耕田于山之下水之上其沒也負山面水以葬焉今其墓林五百年矣中爲蘇太公提舉墓則仕于宋而陶之外祖非邪左爲菊隱暨君疇墓則陶而祔于蘇也右爲三女師墓則陶女避亂不嫁爲尼所謂淳正安道明真者也嗚呼陶氏菊隱之艱貞其元之頑民與其宋之義士也杭州府志義士陶菊隱墓在洛山錢王潭左嘉興府志陶菊隱與趙孟僩殷澄稱秀州三義士洎世

之平其孫允中宜中始歸于雁蕩遂以山中田奉墓下祭夫
壟墓之棘荆荒蕪土田之汙萊侵奪高門右族所不能無于
是陶墓之田蓋屢廢而屢復矣其復于明宏治閒者雁蕩之
子孫楷照勳也其復于崇禎閒者曰發元采廷煜也已而兵
亂暴客踞其地

本朝順治十有六年曰發泣白于當塗而歸之百餘年來又
蝕于他人乾隆三十有三年曰發之孫寵綏又力復之今洛
山蒼蒼山下田七十畝者是已嗚呼三義士也五百年以來
陶且若是而尙未艾我不知趙殷之墓何山何水而其後何
人邪吾知天之必無靳于趙殷也孟僩號月麓宋宗室家黃
巖文丞相開闢江東浙西俱辟以行元兵執孟僩而欲官之
乃避居于嘉禾澄字公衡家華亭元將楊埽地欲屠其境澄

仗劍叩軍門以死爭而境獲全巴延授之軍民總管乃避去
于泖上嗟乎牛山同盡然當其未盡不可使之盡吾豈敢謂
忠孝節義其人之必無窮哉夫天道固有可知有不可知者
已菊隱佚其名

紅藥坪記

職方汪君秀峯官京師曰嘗索其縣潭山館之詩久而未能
以應也去歲丙午乃列其園中曰增之景而一時名流未有
詩與文者俾擇之加粉澤焉余乃記其栽勺藥之坪歛縣之
南三十餘里有水曰緜潭潭之西玉屏山山之後仁源而山
館在源之口舉夫山與潭之勝高下左右松蘿花竹之映帶
一一品題而名之皆可喜則職方之意之所寓而固使覽者
將徧游其閒也京師豐臺種花人三月春暎時盈筐壓擔清

曉入右安門賣芍藥花于南城之市最後出者花愈大而香益深蓋昔之芍藥盛于揚州今之芍藥盛于京師也余歸田四年矣豐臺之花不得見而憶之輒不能忘則今者非取乎職方之所寓而直以爲我意之所寓也且職方嘗餅供折枝以飲我于寓堂矣則夫回思往復歲序之駸駸豈不韞然于斯言之可已而不已也乎抑不知山館平衍之處之所栽如宋王觀譜所謂朱氏南北二圃五六萬株之餘盛否邪我將登玉屏絕高處嘯雲樓以盡攬園中之勝而一慰盈筐壓擔之思焉職方其許我哉乾隆丁未初夏錢載記

蘭堂課子圖記

郡城東呂文懿宅其後碧山學士黃公洪憲居之高祖母黃宜人學士姪給諫公承乾之女我祖又鶴翁嘗居學士碩寬

堂之東屋土阜壘石爲山莓垣相隔垣東銀杏一株雷火劈坼杈朽生枯近千年物也其下數楹題曰蘭堂康熙辛酉沈韶寫蘭堂課子圖藹然須眉獨坐大石袂衣樓屨旁立而背誦者第五伯父輝八歲執團扇立伯父後者先大夫六歲沈治補寫其樹于大石之後蔭樾扶疏蓋四十九歲小像也是後定居東門內讀易堂大夫歲時常挂是圖于回谿翁于經書李漢所謂通念曉析尤好左氏春秋四書文七十六首大夫篋藏根柢經史文散佚僅論十首陸陸堂先生奎勳表弟也其時論次謂似持正集中手意嗚呼庚辰捐館八十有九年矣載生戊子未得見我祖也今者泝洄當日親戚中外門閭風範文字討論固渺然其不可見矣銀杏之處猶存四十年前常過而低回其下我祖小像二其一撫長松披襟獨

立藏之後樓癸卯歸來失去矣是圖奉至京邸獨存況乎世
父先大夫幼齡之容貌皆在而圖之傳已一百有八年夫畫
像歐陽公所謂識其面目蓋思之而不可見見之而致其思
而況于先像乎先世貴四翁孟寬翁失像有像自養素翁載
重畫先像于京師顧先妣像尙闕丁酉在濟南連軸篋以付
家人還南舟漏壞于水年來復重畫蓋有天幸焉次第得養
素翁元配周氏繼室朱氏朴庵贈公配楊宜人兩涯封公配
鄭太孺人魯南公元配俞孺人五像而祖妣像始備嗚呼載
非曰妣像更重也夫不有母何以生其子乃今錢後多不知
妣氏者夫是以記蘭堂圖而羅縷以告我後之人

南宋秀邸月林書院硯記

載八十三歲老矣久病則加老焉求所自娛而及於硯又無

錢以購古之名硯也今乃得此硯以市尺度之修一尺二寸
廣七寸背刻秀邸月林書院六大字筆蹤近李北海端州石
甚發墨墨池甚大使南唐李後主見之豈不暢然於撮襟之
書何止金錯刀邪宋高宗元懿太子薨適選太祖後秦王德
芳六世孫子侁之子伯琮育於禁中最後賜名脊禪位是爲
孝宗蓋生於秀州杉青牖之官舍子侁紹興十四年卒於秀
州封秀王孝宗同母兄伯圭光宗初封嗣秀王此秀邸之所
從來矣書院之設盛於宋卽孝宗賜名瑗時趙鼎議立書院
於行宮教之名資善堂則秀邸而有書院不亦宜乎甯宗慶
元二年以秀州爲孝宗毓聖地升爲嘉興府則秀邸之在嘉
興其月林書院雖莫可考當卽在嘉興而硯故書院之硯也
不知其塵埃廢棄湮沒何所迄今且五百年有餘豈不重可

寶惜乎乾隆戊戌購政和鳳池硯於京師琉璃廠嘗作七言以歌之今年復購一政和硯於東城之書市奇哉一手所琢也今又獲此得不以為希世之寶乎哉庚戌十二月七日百福巷書

擇石齋文集卷第十終

擇石齋文集卷第十二

秀水 錢載 坤一

記二

顯忠祠秋祭田記

明卹贈太常寺少卿禮科右給事中海石公顯忠祠在海鹽縣城資聖寺之西公墓在縣之彭城祠之春秋祭歷久而同墓之春祭直者長子之後中錢浜北老大房舊置田漸以難勝載初心欲增置如現直之數而請家長議隨老大房後墓祠分直兩年一更既因舒力實冀相察以久其傳然聞今所改行者先從叔郡丞汝恭委曲以定者也載官京師未能越局謹別立田四十四畝五分五釐嘉興縣荒字圩十四畝一分五釐宿字圩十四畝四分張暑字圩十六畝冊名曰錢祠秋祭田蓋私祭也蓋更別立田補行先墓秋祭

也霜露既零俾載後世錫敬錫容錫

直之堂心誠禮儉善守斯垂且兩年一交代以先墓秋祭之

田同其直蓋太尉廟祖墓近在縣城西北二里也太尉廟里

人稱太子廟相傳祀漢皇甫嵩公嘗為之記謂予祖墓在廟

東今廟之東祖墓三穴古樹青蒼夫祭祠而兼祭墓相近而

墓先祠後然後徧祭先墓古者廟祀子不先父食若夫先墓

秋祭一房獨直者墓林不遠則日用其同兆域同原則先必

以世合兩田之入可無不足于供者哉其祠祭禮具祝文依朱子集

之文酌以備用維年月日承祭孫某敢昭告于明卿贈太常寺少卿禮科右給事中海石公之位曰氣序流易神明式憑仰切靈帷不勝永慕謹以潔牲醴齊秋薦祠祀尚饗

然香燭薦大盤五格羊豕肉各四斤鴨雞大魚各一中盤十

格時蔬果暨鄉味野菜扁豆橘栗橄欖蜜羅柑菱藕蝦蛤蚶海蜇白皮子諸葷素之屬小盤五格鹽醬醋

蔥薑椒格三粉團角糴各三十初獻酒湯飯讀祝跪拜興亞

獻三獻如之紙錢十束楮鏹千同祝文焚徹以餽毋加品與

祭者眾則加菜腐予守祠者蔬果團糴加銀五錢其墓祭禮

西穴杯箸十正面四右二左二又右二中穴杯箸十四正面

三左五右六東穴杯箸二正面皆具祝文維年月日承祭孫某敢昭告于先祖先妣之靈曰歲序流

易霜露既零瞻省封塋不勝哀慕謹以清酌時羞跪薦祀事尚饗後俱以此酌之皆如祠祭禮慮夫力之煩而心

之怠也權其所再儉者羊豕肉各二斤團糴各十前刻拜祭

墓地之神酒三齋肉二斤大魚一團糴各四紙錢一束楮鏹

一挂焚以肉魚團糴予守墓者夫祭祀之禮從俗而不變今

每歲之秋惟用羊肉十斤豕肉十二斤鴨四雞四魚五粉團

六十四角糴六十四紙錢四十束楮鏹四千者諸餘鮮物立

辦若是其至儉計夫久長而使之久長也承祭者其潔淨而

整齊哉租稅必簿記糧票黏簿以交代察過差毋怠廢準此

以糾夫凡所直祭義之田乾隆四十六年八月十五日
賜進士出身

誥授資政大夫禮部左侍郎祠下仍孫載謹記

太尉廟先墓記

墓以西爲上古法也先墓三穴以西爲上在海鹽縣太尉廟
之東我一世祖貴四何府君妣夏氏居縣之甘泉鄉明洪武
十四年以養馬不報論戍都勻世系諱生卒俱莫攷子二曰
禎隨戍于都勻曰裕畱撫于錢氏今海鹽之支已傳十有七
世而都勻之支居楊安堡祖墓連林相接入

本朝爲耕讀人家補縣學生舉鄉飲賓中式鄉試比歲枝遠
而實益蕃恩撫祖富一錢府君妣潘氏居縣治西世系諱生
卒俱莫攷無子嗣何氏子裕其墓初不知最後墓下孫汝霖

追攷之卽西穴也二世祖易錢姓如淵府君諱裕生洪武十
四年妣曹氏生卒莫攷合葬縣之開濟鄉一都太尉廟東三
百步是爲西穴三世祖考文學養素府君諱寔生永樂初卒
成化初年月莫攷妣元配周氏繼室朱氏生卒俱莫攷合葬
如淵府君墓之左是爲中穴四世祖考贈奉政大夫南京刑
部郎中朴庵府君諱達生宣德六年三月十日卒宏治九年
十月二十一日享年六十有六妣宜人楊氏生宣德八年五
月十九日卒成化十九年九月十五日享年五十有一合葬
養素府君墓之左是爲東穴蓋自載推而上之三世也維諸
支祖其葬同西穴同中穴者按墓碣家譜謹詳於後西穴恩
撫祖妣二世祖妣居中而三世君靜安配潘氏附右四世景
寅繼生配周氏附左五世菊莊配顧氏又附右中穴三世

祖妣居中而四世景行遠配劉氏附右景訓迪配王氏凌氏
附左五世公美珩配張氏公節珮配鄭氏又附右六世繼中
崧配朱氏又附左是為海鹽縣城西北二里錢氏之先墓何
與錢同出高陽氏之後曰陸終高陽黃帝之孫司空季子謂
黃帝二十五宗其得姓者為十二姓姬西祁已滕歲任荀偃
姑儂依然則十二姓皆同宗也而流派之出近古之同姓異
姓者蓋其姓愈遠之同姓異姓者蓋其氏逮夫氏族微而譜
系闕不獨何錢之世始于洪武之年矣顧卽十二姓歷半萬
年惟其中間不絕所以得至於今則何之易錢猶是陸終也
墓下孫臨江太守琦先塋記曰各祖父詔後也載于是乎敬
以書先墓水西北五世公瑞諱璋之嗣單墻承祭者于是日三穴禮畢後以牲醴案拜祭附記于此

先墓秋祭田記

立田五十一畝一分

嘉興縣永十四上十四庄盈連字圩六畝三分永十四上末一庄

字圩田連地十五畝寒辰連字圩七畝九分又六畝又四畝又四畝永十三中七庄寒

一箇字圩八畝九分

為先墓秋祭也冊名曰錢墓秋祭田我錢氏

先墓各立田行春祭而未行秋祭夫謂古不墓祭孟子有東

郭墦閒之文矣至漢世四時皆舉唐詔士庶寒食上墓宋儒

以謂後世習俗廢古祭禮始有墓祭嗟乎今日有廢墓祭者

其歷之久也且必無後埽除絕而榛棘仍吾行于齊魯秦蜀

之墟見夫古冢高起如山無主者墾鋤其半將盡然後知常

祭之墓則其墓可常保而子孫之新壟不蕪穢則祖宗之舊

壟或青蒼理勢然也載之謹此蓋自先大夫墓已上而其直

與顯忠祠秋祭田同先墓皆在海鹽太尉廟者三穴其在化

城封禮科給事中兩涯府君太孺人鄭氏合葬一穴其在彭

城卹贈太常寺少卿禮科右給事中海石府君封孺人孫氏

合葬一穴其在南山明孝廉魯南府君孺人元配俞氏繼室陸氏合葬一穴贈奉直大夫戶部湖廣清吏司員外郎前文華殿中書舍人巨源府君宜人馮氏合葬一穴文學君政府君孺人祝氏合葬一穴三穴皆在萬蒼山麓其在塢城明山東道監察御史孚于府君宜人黃氏合葬一穴

皇清地贈通奉大夫明孝廉雍頌府君夫人譚氏合葬一穴誥贈資政大夫國子監生又鶴府君夫人元配陸氏繼室吳氏側室全氏合葬四兆府君弟國子監生亦駿府君孺人元配許氏繼室葉氏合葬三兆一穴三穴皆在八都鹹園楊家橋其豐山相近攜鰥兜遠祖何公之墓在焉先大夫墓在洲航山麓萬蒼山麓之右蓋自先大夫推而上十三穴也歲取田之入使常有子孫埽除蕪穢以敬奉秋祭何公之墓臨江

公請告歸始立碣而題之記曰鄉父老或指爲何長官墓冢中瘞者或貴四翁之考妣或祖妣已上皆莫得而知或指冢前水爲何家浜則今之攜鰥兜而其時同縣吳方伯昂鍾太守梁鄭端簡曉皆有錢氏遠祖墓之詩太尉廟之西穴商隱先生追攷謂恩撫祖富一錢翁妣潘氏之葬實在穴內嗚呼貴四翁松楸萬里不有恩撫我其能反而祭何公之墓乎蓋自恩撫翁媪已下何公之墓已下霜露既零由化城而彭城而塢城攜鰥兜而太尉廟暨顯忠祠而南山舟行百里之間路順一舟之便村山紅樹新米香聞其差無荒寂矣哉夫不有祖宗何以有子孫載不能歲寒食以上冢少而授讀去其鄉旣官于朝乾隆甲午奉

命典江西試乃請假省墓攜鰥兜十二歲先大夫攜拜墓下

至是六十七歲矣嗚呼先墓之拜世固有如是之難焉者乎
定爲禮前列拜祭墓地之神香燭酒三爵豕肉魚各一團糴
各三紙錢一束楮鏹一挂焚以祭品予守墓者墓祭具祝文
薦大盤五格豕肉二斤雞魚各一左右新米飯中盤十格時
蔬果鄉味鹽醬醋蔥薑椒籠燭爐香初獻酒湯飯讀祝跪拜
興亞獻三獻如之紙錢十束楮鏹千同祝文焚十穴之禮同
至儉矣其惟紙錢楮鏹之焚則必多哉記曰明器神明之也
南朝有業鑿紙錢者此非備物而無所用如古之塗車芻靈
也載之後三支兩年一交代以顯忠祠秋祭之田同其直莊
星之後其助祭如禮乾隆辛丑八月載謹記

祀田記

立嘉興縣永十三中九庄月連七字圩田十五畝地八分永

十四上十二東成字圩田四畝一分地一畝八分又五畝六
分永十四下十七庄圩田十七畝三分背字圩田二畝五分
總四十七畝一分是爲祀田夫所謂祀者先人之家祭也載
子世錫敬錫容錫三支兩年一更直今定忌日之祭自支祖

始謹誌忌日我支祖五世祖考贈戶部員外郎巨源府君三
月二十日妣宜人馮氏十二月十二日高祖考侍御孚于府
君九月一日妣宜人黃氏五月十七日曾祖考

皇清地贈通奉大夫明孝廉雍頌府君五月四日妣贈夫人
節孝譚氏四月一日祖考

誥贈資政大夫國子監生又鶴府君六月廿六日妣贈夫人
元配陸氏正月初二日贈夫人繼室吳氏十二月二十八日
贈夫人側室全氏七月二十六日考

誥贈資政大夫國子監生葯房府君正月十日妣贈夫人元配朱氏五月五日贈夫人側室陸氏九月二十一日側室丁氏九月初四日遇日合考妣以祭酒飯各薦四簋葷素各二務整齊潔淨也香燭紙錢四束楮鏹千直田者先日聞于莊星之後俱來祭所拜祭其能各祭于其所居者則非所敢限也如是則先人忌日之祭必舉而不祭者可有禮矣今定四時之祭自支祖推而上至于一世清明夏至中元十月朔日自一世祖考妣以下合祭如先像之禮設席五酒飯各薦大盤四葷素各二香燭如忌日之禮而紙錢四束楮鏹千各席各獻直田者亦先日聞而俱來祭所拜祭如是則先人四時之祭必舉而不祭者可有禮矣載誠知夫貧而不能祀其先者無可以安于心也況幼而去家投讀父喪白日走客京

師既官于朝即舉先人忌日時祭于京邸鄉園三千里其焉能如家之講講然近在而尤親切也我後之人其勉勉而繹思之故立此田冊名曰錢祀田永與載墓下田同其直司其租稅簿記糧票黏簿以交代其有過失者眾議之夫依賴先人得常霑祭肉味則平時亦可以自節其口腹矣今張夫人七月十二日增忌日一祭載三子後俱同拜祭其如禮乾隆四十六年辛丑八月十五日

賜進士出身

誥投資政大夫禮部左侍郎載謹記

祠田記

立嘉興縣芳字圩田廿一畝月六字圩田廿五畝三釐總四十六畝三釐是為祠田錢氏未有宗祠乃每歲除夕至新正

二日挂先像而祭之爲也我五房支祖巨源府君始自半邏
遷郡城角里街祖又鶴翁始買宅城內巨源府君配馮宜人
三子長侍御孚于府君次山徵谷庵爲滄嶼公後子商隱先
生乏嗣矣次福徵厚庵乏嗣矣庶出治君政無子三支承祀
祠堂主嵩厓府君也而老五房惟侍御一支侍御一子孝廉
府君孝廉二子

誥贈資政大夫又鶴府君國子監生亦駿府君于是兩支之
傳七房今七房之傳兩房又乏嗣寒門零落享祀愈疎載之
立此田實惟先像之祭是亟夜堂鐙燭髣髴音容炊飯一盤
仰而跪拜尙知有祖宗考妣之可依可慕乎定爲禮至儉矣
蓋自載已上一世祖考貴四何府君妣夏氏恩撫祖考富一
錢府君妣潘氏二世祖考易錢姓處士如淵府君妣曹氏

供三世祖考文學養素府君妣元配周氏繼室朱氏始有四世

祖考贈奉政大夫刑部郎中朴庵府君妣宜人楊氏五世祖

考封禮科給事中兩涯府君妣太孺人鄭氏合祭設一席於

堂酒湯飯各獻大盤五格薦羊肉四斤豕肉四斤鹿肉三斤

無鹿肉或雉或鷺鴨後皆同雞魚各二中盤十格葷素鄉味蔬果從其宜小盤

五格鹽醬醋蔥薑椒粉團饊然燭焚香紙錢五束楮鏹一千

是爲中席之禮然後六世祖考卹贈太常少卿海石府君妣

封孺人孫氏七世祖考明孝廉魯南府君妣元配俞氏繼室

陸氏合祭設一席于中席之左酒湯飯各獻大盤五格薦羊

肉二斤豕肉二斤鹿肉二斤雞魚各一中盤小盤其薦如前

然後八世祖考贈戶部員外郎巨源府君妣宜人馮氏九世

祖考御史孚于府君妣宜人黃氏宜人卒于松溪孚于府君攜櫬歸里失其像合祭設

一席於中席之右祭品如左席然後十世祖考

皇清貽贈通奉大夫明孝廉雍頌府君妣贈夫人節孝譚氏

通奉府君卒于明崇禎壬午巳而寶澤堂燬失像節孝夫人不畫像先祖考在日畫主以供十一世祖考

誥贈資政大夫國子監生又鶴府君妣贈夫人元配陸氏繼

室吳氏側室全氏合祭設一席於左席之左然後十二世顯

考

誥贈資政大夫國子監生葯房府君妣贈夫人朱氏生妣贈

夫人陸氏庶母丁氏合祭設一席于右席之右祭品皆如左

席于昴子孫其跪拜如禮錢鏹各焚立冊名曰錢祠田載後

世錫敝錫容錫

三支其永與資政祭田之更直同夫供像于

一堂若祠然矣白載已上則一支承祭者其兩支俱同拜祭

即可無別設祭矣且白載已上推至一世則又鶴府君支下

亦駿府君支下俱同拜祭即可無別設祭矣于是俱至而列

拜可先後至而各拜可于是有不答拜者有答拜者若夫上

推一世而設祭則豈限其禮之所自盡哉每歲之除夕小年

夜禾俗以新正二日為小年夜惟用羊肉二十四斤豕肉二十四斤鹿肉二十

二斤雞十二隻魚十二尾葷素鄉味蔬果團餅紙錢五十束

楮鏹萬雖歲之歉慮無有不足于供者且禾俗有茶食果品

團餅歲朝及二日之禮其各供中盤十格曲禮曰禮從宜使

從俗他日載與張夫人侍考妣席旁設箸兩副所幸子孫齋

衍他日推行而又各設若公堂者焉則豈非眾之所至願乎

且承祭之房以所徹邀諸房子孫男外婦內為新年之會其

歲歲如是也禮行氣和而情可浹哉租稅必簿記糧票黏簿

交代過失者眾議之乾隆四十六年辛丑八月十五日載謹

先大夫墓祭田記

孝男載謹立海鹽縣唐字號田八畝九分嘉興縣新十二上十四天字圩田二十六畝四分又永十四上十四庄盈連字圩田九畝總四十四畝三分是為
誥贈資政大夫考葯房府君
誥贈夫人妣朱氏

誥贈夫人生妣陸氏暨庶母丁氏永安湖洲航山麓一穴四

兆墓祭田大夫三子莊星之後同拜祭載三子世錫敬錫容

錫三支兩年一更直敬錫於其母之喪降服夫降服子則為

其子者為其孫也且孫之後愈遠而常同則猶知其本生祖之墓也又安知其不有益于本生祖之墓哉司其租稅簿記

糧粟黏簿以交代其有過失者眾議之前刻祀墓地之神酒

三齋豕肉雞魚各一粉團角糉各十香燭紙錢一束楮鏹一

挂焚以祀品予守墓人墓祭之禮具祝文朱子文集有墓祭文今鈔以酌用歲序流易雨露既

濡瞻省封塋不勝哀慕謹用清酌時羞祇薦歲事尚饗秋祭改用霜露薦大盤五格羊豕肉各十斤鴨雞

大鮮魚各二中盤十格時蔬果鄉味鴿雀棗栗韭筍甘蔗地栗青菜雞子海蜇白皮子餅菜粉皮腐乾之

屬小盤五格鹽醬醋蔥薑椒格三團糉各百籠燭焚香初獻

酒湯飯讀祝文跪拜興亞獻三獻如之紙錢八束楮鏹四千

同祝文焚右祭其必潔也不敢豐者計長久也至儉矣所當

遵守矣飲餞即祭品以辨毋加品席六人嚮上三揖齒坐酒

率三罈所幸孫枝蕃衍則量加韭腐其有於定品外思所嗜

以潔薦者誰曰不宜且有攜肴核來於入席次以酌其宗從

者又誰曰不宜飯已均分團糉嚮上三揖具錢千均給于船

人禮至儉矣所當遵守哉立冊名曰錢資政祭田其永與祠田之更直同乾隆四十六年辛丑八月十五日賜進士出身

誥授資政大夫禮部左侍郎孝男載謹記

幼曰上冢行永安湖北岸守冢人指山麓曰周王山也山中入于一支隴曰某山者隨所習而名之也意嘗有周王其姓者屋於是今大夫墓在焉澗水東戶部公墓又澗水東孝廉魯南公墓載以意改題曰洲航山墓右石牆之外後買山四畝葬亡弟莊星又謹記

張夫人墓田記

祭田為先墓之祭也而亦為子孫之承祭者可稍節其餘以補日用之闕載所欲豫立載墓下祭田張夫人在曰嘗知之

今靈匱將自京歸葬先為立墓田他年其同此享矣嗚呼夫人未嘗自厚一飲食未嘗輕敝一衣也辛酉載授讀德清我母朱夫人持貧家益力清明歸祀先喟然曰死而祭頭不如其生而祭喉也載聞之心痛蓋禾諺有是語也四月盡我母病載恩遽自德清歸母病亟以五月五日終嗚呼痛哉先大夫既授家政載束脩所入薄夫人以之養我父嘗有肉不孝載不能養我母以夫人之養我父也未嘗一為之言夫人亦未嘗為載言也嗚呼載不能養父母其敢有以及于妻夫是以夫人夫婦四十九年家園邸舍百事蕭然所謂一世矣今乃為之立墓田且以自祭亦實為所生之三子嗚呼夫人其尚心安之也其田嘉興縣承十四上十二東成字圩三十一畝一分屋一間基地五釐承十四中十一餘字圩十三畝六分餘字圩十四中十一桑地五分總四十五畝二分五釐立冊名曰錢墓田世錫敬錫容錫三

支永與錢祀田同其直其春祭如洲航山先大夫墓下之禮
秋祭如先墓之禮以行乾隆四十六年辛丑八月十五日載
記時年七十有四

錢墓地記

青囊下三卷一曰海角天涯經下士得之於何老人哉穀城
山下之黃石太史公曰亦可怪矣顧地理有也文公朱子山
陵議狀切實言之且公之敬慎以安其親之體魄也蓋可思
此吳草廬先生詩亦云葬術傳自晚唐也比年皆信蔣平階
地理辨正之書其來謂得之冷謙平階字大鴻初名雯階字
馭閔明季嘉善縣學生也嘗見幾社會課文一小卷有其文
冷謙字起敬嘉興人也洪武時太常司協律郎嘗見張宣至
正時聽冷起敬琴詩墨蹟而世傳其仙去云今蔣書之祖青

囊皆本於河圖洛書八卦然歐陽公謂河圖洛書怪妄之尤
甚者則夫青囊者其柰之何哉夫地理有也天也蓋蒼蒼者
鑒其有德鑒其德之大小而與之地其人德也有財以求而
得無財以求而固得矣其人不德也無財以求而不得有財
以求而固不得矣蓋惟其所以得者人而後其所以與者天
經典所言自天之下何一之不若是哉載之三子將葬其母
用蔣書者說買地十一畝一分於嘉興縣永豐鄉九曲裏癸
卯冬載蒙

恩歸里遂以葬張夫人而卽自營生壙桑田稻壟村港相依
其在書曰降之降之蓋天道之所以降之者其在於斯矣張
夫人生桐鄉縣東嘉會都安橋載生郡治羅城浜何知有所
謂九曲裏哉而其骨乃俱歸于此歲云暮矣徒以申言其得

不得之數蓋嘗見夫曩古深山高原兆域千里百里形勢其所藏何如人哉且嘉禾所見古名墓氣象其何如人之藏哉即我祖宗墳墓山水其何如也然後知分寸之攀躋有不容其私心竊冀者夫葬術非雜即妄蔣書猶一綫遂於理顧鑿其說者人人殊然地無也非無也不得則弗之見也不得則見而猶弗之見也事難更僕何莫非其人之天哉即不用蔣書也亦然今其地立冊名曰錢墓地而記之乾隆丁未八月十九日載年已八十

侍御公義田記

明崇禎之初元高祖孚于公以貢生伏闕上疏劾魏璫壬午選授松溪知縣旋擢山東道監察御史

本朝順治三年丙戌高祖母黃沒于松溪丁亥公還自閩卒

于里此載為公元孫稱祖曰侍御公也公一子崇禎丙子孝廉雍頌府君孝廉子二先祖

誥贈資政大夫國子監生又鶴府君叔祖國子監生亦駿府君先祖六子以第三子後于弟而叔祖遺腹子一侍御公之後蓋七房也至于今二房乏嗣而五房以六房之孫為後實則五房矣詩書之澤衰微飢寒徒迫思之思之古者孝友睦婣任卹其何人哉載晚達惟賴

聖主深恩屢加拔擢至貳于卿班然安所得有財以補理先祖子孫之事歲鄉試典試諸臣蒙

恩給之盤費銀兩載自編修至侍郎蒙

聖主深恩己卯廣西乙酉江南甲午江西己亥又江西庚子又江南典鄉試者五先後祇領盤費因得節餘而積少丙申

蒙

恩督學山東半任報滿養廉所節一千四百兩先是補置太尉廟祖墓祭田五畝太常公顯忠祠木器其已亥江西盤費三百兩又山東養廉一百兩將置高祖支下義田貯京邸三年寄家而未就癸卯蒙

恩予原品休致歸里始得定其田四十七畝三分八釐太常公公曾祖也舊有義田百畝時則請于族以田十九畝九分五釐增入凡若此者皆實受

君恩之賜伏念豐田盛殖富室之常何屑屑若是誠以臣家之所賴皆惟

皇澤之所濡或者其歷世以申延而不即于堙廢乎夫是以敬告于後之人載本無田且離江鄉者幾四十年不知田也

所增入太常支下者明年諸從以其田非腴也慮歲之饑何可損舊之肥以益新之瘦而反其田載思豐年多凶年少也豐年多粒米亦可療一日一口之飢爰以所反田增入高祖支下又買其旁車溝之地八分總六十八畝二分三釐是為侍御公義田而立冊名曰錢公義田擇賢輪直其分米如太常義田之規矣嗟乎人多田少也何足以資其飢寒之生載若未死者補理先人墳墓之事竟尙其增置之哉現在田海鹽縣呂坊嘉興縣大十六五庄調字圩號內記此者將以敬俟後人之加置乾隆丁未八月初五日元孫載謹書

資政義田記

府君厚荷 國恩榮膺

誥命初贈朝議大夫再贈三贈通奉大夫四贈資政大夫乾

隆癸卯載以衰邁蒙

聖主深恩予原品休致嘗記朱子告休焚黃考妣謂流根之

報無復後期如斯言者為人子也載惟賴

君恩拔擢又俾歸田報恩無所何能有以及於親前三年庚

子立大夫支下義田僅五十一畝九分嘉興縣移九上一庄小寒字圩號內移九上四庄某字圩號內

移九下三庄某字圩號內于是題曰資政義田立冊名曰錢資政義田而綴之

詞以定其規大夫三子載莊星也莊星蚤卒載三子世錫敏

錫容錫敏錫為先從兄虞田後然載之降服子則大夫之降

服孫也其後亦食此田矣莊兩子禮錫六老星一子保錫六

老不習業悖教訓此不合于食義田者然大夫之孫近也姑

給之自後若六老者不給之矣前此輪直既歲收所入三股

均分歲凶則有米者讓無米者後此其仍擇賢兩歲一更先

納國租後分家米歲豐即人多難足亦米少必均矣康熙戊

戌大夫歸自京師油鐙夜坐始聞與先夫人願仿文正范公

義田贍族自後常常言之載聞之而竊亦有心顧六十年以

來安所得金授徒不力嘗失館服官無狀嘗奪俸鐫級革職

畱任顧安所得金苟其取非義之金以謂是義與也恐重違

大夫未逮之志夫置田甚少則宜增載徒老不能矣三子衣

食無餘殆不可矣夫惟追昔以知難又何敢恕今而有望雖

然日月長矣天不靳人求福者遂他日大夫之後曾食此田

者或增置一畝亦云義也則并入于冊其或多增則刻石以

敬俟夫後乾隆丁未八月初五日男載八十歲謹記

九豐義田記

載三子無一畝之田分授之癸卯二月載以衰邁蒙

聖主深恩予原品休致十一月歸里亡室張夫人匱辛丑秋

冬世錫自京扶歸既卜地嘉興縣之永豐鄉九曲裏遂以十

二月葬張夫人即自營生壙先是敬錫容錫將葬其母築如

丙舍者三楹於今墓之西載取義束皙之詩九穀斯豐以適

合其地之永豐九曲名之為堂而曰九豐甲辰春

翠華南幸載赴常州恭迎

聖駕蒙

恩賜緞一端時 皇子隨侍見 十一阿哥于舟次謹請書

額以詒此九豐堂之所以成也三子卜地時置近鄉之田因

以其田立為三子之義田蓋分米不分田也于是即堂以名

田而曰九豐義田夫無一畝之分田而有此田之分米均于

三股旬月糧也果其為善讀書訓蒙得束脩以自補其闕菜

根脫粟夏葛冬棉

聖世之良士良民上可承先下可啟後長如此也仰天俯地

者樂哉樂哉或者增置而多之非義之財勿以增也或者各

置而遺之非義之財不可遺也然此亦何敢期必哉其田總

九十一畝五分五釐嘉興縣東成餘字往字三圩三十二畝二分永十四下十七

二十七庄六畝一分五釐月八字圩十一畝五分又月八字九畝永十立冊名曰錢九

豐義田三支輪直兩歲一更其均如前記行乾隆丁未八月

初五日載八十歲書

擇石齋文集卷第十二

傳

馬得功傳

秀水 錢載 坤一

馬得功漢軍鑲黃旗人祖籍福建甲申明福王由崧自立于南京得功附之爲總兵官順治二年五月己丑王師渡江由崧走太平蕪湖丙申南京城降田雄給負由崧走投軍門並縛其妃以獻得功實協力俱來丙午執由崧至南京以歸京師隨授得功爲京口總兵僞王朱誼泐與其經畧章爾韜總兵楊三貫等聚掠得功率眾悉擒斬之四年進福建提督陳巳者倡逆連海賊陷松溪縣得功勦之斬僞總兵魯念什等三十餘人生擒已及海賊翟大梧蔣雲卿等百

餘人復松溪於是海賊康三賜高士通包自惺等以一千二百餘人降捷聞授一等子爵十八年追敘擒福王投誠功封三等侯康熙二年勦海賊會故福建總督李率泰以舟師進薄廈門金門諸島得功身先士卒深入賊巢與賊將周全斌等遇于烏沙港方力戰自辰至未而援師未至颶風暴起死

之事聞賜祭葬謚襄武立碑于墓加封一等侯又加雲騎尉世襲罔替

張承烈傳

張承烈字繩武漢軍鑲白旗人世居瀋陽父卿累軍功官至福建甯副將承烈例得七品廕康熙十三年逆藩吳三桂叛國家方用兵承烈年甫少學擊劍銳志從戎十四年始

隨副都統郎化麟于山東兗州敗土寇有功署參領尋隸將軍穆占于湖廣十六年僞將軍吳國貴據長沙以賊數萬抗王師時將軍令各旗諸將士之當掘壕與登陣出戰者日分旗爲更替其日鑲白旗應掘壕而正藍旗應出戰承烈乃請于將軍願出戰不願掘壕穆占壯之許焉承烈冒矢石直前戰且久賊目賊其勇突中以烏鎗承烈負痛奪殺猶刃連下賊益環鎗圍之決上流水驟至以淹沒于陣二十五年議卹贈雲騎尉以其子孫襲乾隆十五年蒙恩追念承烈爲國捐軀加給七品官世襲罔替

楊烈女傳

烈女嘉興縣梅里楊汝雯女少習詩書許同里陳生學澍未昏生亡兄嶽壕戒家人勿使女聞知居有頃生家來取聘物

女始驚駭哭鳴鳴願欲往陳守貞兄不之許且婉轉勸其再許而嫁女乃絕粒吞鉛粉醫三日不救以死年廿有四歲實康熙五十八年八月日也嗚呼方生家來取聘物義與楊女絕矣且卽未昏而再許以嫁於禮無乖違顧女之死必若是可不謂烈哉越三十有六年而同郡錢載書其事

上烈婦傳

烈婦楊氏浙江平湖縣人父兄儒學生以乾隆戊寅歸同縣儒學生卜錢熹卜故秀水思賢鄉舊族堂上姑祖姑皆愛婦甚諸叔皆以姪猶兄也已卯生秋試報罷抑鬱以病氏曲譬侍湯藥病亟禱先祠願以身代而生竟不起旣斂泣告於姑祖姑曰新婦不辰致夫夭折將來奉養諸叔任之義有相從地下耳姑與祖姑百方慰之寢食與俱父兄曰相走視開歲

正元晨起隨姑行獻歲諸儀容止自若以故防護少閒而氏遂乘此時入房投繯畢命矣年二十有五距夫亡甫三月蓋未有所生也明年春同郡錢載聞其事書之以俟請 旌之有徵

黃烈婦傳

同年雲南永北黃君素庵令甘肅入爲禮部主客主事其家府城夫人熊氏一子鈞例貢生鈞之繼娶蔣氏未舉男今年鈞二十有四歲而病沒于五月五日方鈞病亟氏已痛絕不欲生越七日內外服屬畢集也朝食婢在廚下婦乃入室闔戶自經死稍梳櫛衰麻被身實乾隆乙酉五月十一日年二十有一歲蓋家人防之不及防也黃君得家問旣悲子之蚤世復哀婦之殉其子者烈也而屬載書其事永北之登進士

者在明有譚進士 本朝乾隆丁巳始有劉進士及壬申黃君而三今烈婦之死非止爲門戶光後來永北之稱黃氏者不惟以進士矣烈婦布衣蔣奇勳第四女生于甲子八月二十五日其結縭也癸未之七月二十九日

夢堂詩老傳

元遺山于辛愿敬之有溪南詩老之稱前此則瀘南詩老也今東閣相公蚤歲自號曰夢堂其稱詩于江南知之者且五十年于是 朝之後進翕然推之余之信而題曰夢堂詩老非其所自爲矣詩老之詩溫潤縝密超然意象之表姜堯章謂及其無見乎詩不求與古人合而不能不合不求與古人異而不能不異何其善言詩老之獨造而自得也其居京師北城手植海棠一株于檀欒草堂四十年矣春時必文讌花

下街南壘石架閣曰獨往園九日必高會以眺城西諸山苑西寓直之所亦築小閣以眺西山平生抑然道義澹交如水置身和介之間而一寄之於詩可以想見其中之所韞也已詩老舉雍正壬子順天榜名英廉其先遼東姓馮氏初嘗作吏江南晚而致位政府其事當在 國史非余所得書者夫賢才出應 昌運鴻文彌綸而其下政事之餘詞華自見則固我 聖主所有之人也不其偉與乾隆癸卯四月之望秀水錢載傳

地贈修職郎懷甯縣儒學教諭陸君家傳

寶山縣學生陸惟軾介陸朗夫中丞子綱具書以祖贈教諭厚庵君家傳爲請而謂其先府君榜姓陳諱芳槐之志乾隆

十七年

恩科鄉試順天中式舉人二百三十名載第三十五其第七十六張耀朗夫也本姓陸第七十八則陳芳槐皆同年生也于是越三十有五年矣君名汝寬字浚宣號厚庵按芳槐行述云府君至性過人素履淳篤而嘉定錢少詹事大昕誌芳槐墓謂厚庵舅弟四人門無異財有浦江鄭氏之風蓋君沒于戊辰芳槐之舉壬申而沒于丙申又十有一年而爲之孫者猶永思若是嗚呼是可以觀君之德已高祖以上居上海東鄉曾祖愛泉始徙嘉定高橋鎮今分入于寶山祖孟玉慷慨有志所居僅數椽立家祠于東而刻遺訓于石父太學生省齋端介訓子嚴從弟淇右蚤世撫其孤寡嘗多蓄法書名畫後以其季援例授職祖父皆得

誥贈奉直大夫君仲子也年始十四省齋銳欲以讀書起家乃獨令廢舉業佐治生其家故貧得君備歷艱苦家以漸起既兄弟爲學官弟子君乃辦裝勸更游學而身任門戶今陸之子孫皆讀書然後歎省齋之知其子韓公所云固于是乎在伯子剛直居常論事或詰難聲厲君從容片語兄且欣然叔季或直陳所見每聽受無忤色縣之人皆羨陸家孝友之樂省齋身後伯子亦急治生寓吳門久一切家事悉令裁決蓋無失兄意者通青囊術初葬其祖時卜壤吉省齋意莫定君一言以定及葬其父審慎數四而後兆域成或病其泥君曰地理不可知惟先人體魄之安豈以求福哉從母氏從嫂氏苦節爲之請而旌其門族有孤女必善嫁之親故有不能喪不能葬者助之匱乏者求輒應壬子大水從父淇右從

兄樹庭匱俱衝漂乃沿江岸跣涉葭葦叢中數十里足指盡血竟得兩匱以還丁卯復被水溺死者徧江海之濱乃請于上海寶山兩縣令倡諸長者率錢盡收遺骸封爲義冢君自少好讀書至是益聚書口決家事手一編不輟數爲子弟舉古今成敗得失之故曰士當通達事理又曰士貴立志如小學以明道希文自期待者名其堂曰四益蓋取後漢書藝文志之義三十年間兄弟嘗以過勞勸君曰勞則善心生迨其沒也神明炯然命焚香家祠遺言曰立身績學以勤爲本年止四十六芳槐爲學官恭遇

覃恩得

馳贈修職郎懷甯縣儒學教諭元配蔡贈孀人卒年二十五生子一卽芳槐繼室沈封太孀人生子三芳松芳柏近光孫

惟軾惟翼惟磐曾孫揚曾敦曾述曾顯曾繼曾君嘗游于吳門愛其山水欲家焉旣沒伯子以所營長洲生壙讓君惟軾等卜之棺前不許伯子乃爲卜于吳縣之堯峯其君之志也與往者爲陸燿曾祖撰吳江最角圩之碑江東之陸在元二百六十餘支則夫四百年以前寶山之陸吳江之陸皆魏晉後之江東也今歲丁未綴此文亦俾其補堯峯之墓之未有誌

戚連江家傳

君姓戚氏諱弢字魏亭一號研齋父以賜研畀之卽自號也先世浙江東其遷德清自諱鄉者始七傳至君父諱麟祥歷官翰林院侍講學士五子君其次也生而嗜書襁褓嗁笑見書輒止及就外塾不煩講釋曉徹大義翰林胡彥穎吳

家騏皆其師學士所交如徐用錫陳鵬年輩多碩德鴻才君幼侍得聞言論博覽載籍康熙己亥補縣學生庚子舉於鄉主試臨川李紱浙之名榜也是歲學士以事謫戍甯古塔君乃隨侍戍所聞之甯古塔去鸚哥關一千八百里其地有一士阜初名之特後轉爲臺再轉爲塔固無臺無塔也掘地得正隆錢或謂卽金之天會府寒暑不時與內地異君旣扶持久學士遣之會試雍正庚戌與仲兄振鷺同登進士是科一甲皆浙人周霽沈昌宇梁詩正也而君以奉

旨派福建學習其時有進士學習知縣例遂知連江縣事連江叢山環海故多虎亦多盜君嚴法捕之盡於是勸農桑興教化編保甲務相感以誠相說以信賦惟正供訟無畱牘又設普濟堂育嬰堂義冢濬城河凡以贍民之生而恤民之死

也乾隆丁巳山水發大風雨縣治且溢八月拔蛟颶不止南門水高丈餘君肅衣冠拜禱風止水勢定於是上請捐銀穀賑貸並請捐田賦其水所衝陷者得永蠲除明年又饑募巨室捐米平糶四旬餘民以活嗚呼斯亦足以徵其治行哉縣有東湖隋開皇閒義士林堯捐田瀦水所成隄之以漑田四萬餘頃千餘年矣侵占淤塞上塍崩豁洎水災後內隄蕩然外隄復決開二十餘丈君亟上請乃加石築土修二百四十餘丈廣四丈隄成上植桃李雜樹下種荷蕖立祠以祀林堯民歌誦之又修學宮設義學修縣志之修于元而久不修者連江之人方樂君之靡事不舉而相與爲連江幸也

皇上初元

恩旨赦還麟祥君益感奮曰弢言其何以一心報國乎將迎

養罄橐遺弟朝桂歸畢諸昏嫁事於是築室三閒聚書其中以迎養其父連江人曰吾侯孝子也庚申冬學士病劇不起君居喪幾毀蓋自庚子以還奔馳鬱轡積患嘔逆至是扶喪歸營葬未成而疾大作以沒四十有四歲連江人聞之相與率私錢祠其侯於東湖之上嗚呼君之一生可不謂難乎其於道也蓋庶幾哉今歲辛亥其家乞按其子更生所具行述作傳以俟族譜之收采

王節婦傳

節婦王氏曹甯妻曹家于秀水縣太平坊王家于嘉興縣王家坊相近在嘉興府城也王之先居王江涇遷于府城九傳而爲婦之父臣桐鄉縣學生母巢氏明崇禎丙子舉人鳴盛之孫生女二長卽婦生康熙二十四年十一月初十日二十

四歲而嫁嫁五年而甯以食貧學爲儒訓蒙養父母勞瘵沒遺孤懷祖甫三齡時婦二十八歲也伏屍長號出血不欲生翁曹袞秀水縣學生姑姚氏嘉興縣學生姚寅女衰門薄祜內外無親若婦竟死則曹氏且不保其先祀矣銜哀強起日惟倚十指以存活夏無暑冬無寒米缺忍饑以不餒其夫之父母鄰里悲之教懷祖讀書翁姑相繼沒盡力殯斂先後三棺權厝他姓地母子衣食歲不周乃買地嘉興縣地字圩之永十三庄葬其翁姑葬其夫今鬱然松楸成墳矣蓋辛苦備嘗者五十三年至八十歲而以乾隆三十年正月二十二日卒後十餘年太平坊人相率謂曹家寡婦之節何以遲而弗請旌也里鄰親族具事實呈學牒縣申府司浙江巡撫疏請四十有八年十二月禮部具題奉

旨旌表官給建坊銀三十兩立主祀縣之節孝祠載入志書
又二年節婦孫貢生大全屬其友以姚氏王氏之族譜來乞
傳 贊曰今日知里中康熙間有少貧力學曹甯其人者徒
以其有節婦也 朝命旌婦名其夫以俱傳嗚呼世之節婦
有重于其夫者且庇及其子孫曹氏未有譜敘節婦以託始
其譜

趙孺人家傳

孺人趙氏吳江望族考諱廷相鄉飲賓母顧氏明成化辛丑
會元趙寬其七世祖也孺人年二十二而歸同縣范莖工部
侍郎諱燦之次子少司空長子理則蚤世無子孺人以始生
子墀爲之子今之請孺人傳刻垂家譜以徵其本生母之德
於不忘者卽墀也墀生甫九歲孺人稱未亡人少司空以甲

辰進士改翰林院庶吉士外而歷官兩膺巡撫三十年閒孺
人之恪勤子婦職也布素操作雖無專於家事而鉅細豐約
合其宜旣痛其夫之抱才蚤世撫其諸孤教訓成立奉翁姑
之疾病醫藥喪葬蓋有范氏之家風持己以嚴待人以恕宗
族之不足者調之鄉黨之待舉者助之而視夫之妾王氏體
恤尤至其沒也呼子孫而告之曰我家以讀書登膺仕若無
慚祖德卽無負 國恩矣是皆墀謹述母氏之行以願徵諸
不忘云孺人生康熙五十年月日卒乾隆五十一年月日享
年七十有六子三孺人生墀城王氏生塏孫十一子孫多爲
國學生縣學生皆孺人之所教以承少司空之令緒者已



